

Paulus wasi atyahy ikesy ti ribun matohak mamin ti nus lan Romake

Tun a khatu nekre klyosu kitab ne kralake

Heitlulswo nus lan Roma neke kanike kimelir ti nuske ktem ne, kali nus lan Roma neke Kaisarke* imin ti, ma hyareta nus o hnu ribun nekre, ode negara-nare ribun dakun.

Paulus kyesy atyahy ne ti ribun matohak mamin ti nus lan Romake ne anakyai ti ain a 57ke, ma yajar sir ti ktela mlay a ratohak ti Kristuske ne, kali lenla kika klelan a eras, ma bisa ma Paulus byai nus lan Romake ma yajar sir ti desy. Dendye kyesy atyahy ne ma kyeluk a snurat maka kbuanare, ti iry a Kristen-are wait mormyorif sew kyaki nekre. Dendye kmunmunmuna neke Paulus lyosu ohe, Brit Eras iabrita ti sir ne klyosu ohe, kolkyabei ma irkye bisa ma mlay a i ti Hulasokwe, neke lema khyali ktela eras ialanare, de cuma mo kali tyohak ti Hulasokwe myesan bo (1:17).

Ktela mlay Paulus iajar nekre kisike kolnye: Iry manosy a klolan Yahudike, ode manosy a klolan salik nekre, sir ne mumu neke rala lim o sal (3:9-20). Ode lema irkye it a mlay a i, khyali ktela eras ialanare, ta khyali itoha tnyetak Musake ne (3:27-28; 4:15). Keskyede ity Ebut Hulasokwe byohe, iry matohak ti Yesus Kristuske ne mlay a

* : **1:0** Kmata Kaisar ne ti tel Romawike kbuanke o raja i ti raja-nare ta iry mahareta lan lahukke.

sir, kali Yesuske myaty ma lyitan eta sir de (3:24-25; 5:8). Dendye kolnye ttohak ti Yesuske, desikeo Hulasokwe yaditi ity toha ity wait lim o sal, ode you ohe ity neke mlay a ity ti I (3:22,26; 4:24-25; 5:1).

Ode ti pasal enasimke ma ti kyait pasal walkwe (Rm. 5-8), Paulus ihes iry matohakare ti ratot mormyorif maoly kabei ne, ti kyoat Hulasokwe yaorif sir desy. Neke ne: sir neke mlay a sir ti Hulasokwe, ode lim o sal lema khyareta sir de, ode tnyetak Musake lema kyety eta sir dakun de. Ode Paulus lyosu dakun ti kolkyabei ma Hulasokwe Memeanke kihareta iry matohakare wait mormyorifare ne.

Kyala kyosy pasal sikwe ma ti kyait pasal a hean a kresi sasamke (Rm. 9-11), neke Paulus yaklol Hulasokwe ibuke, ti iry a Yahudi-nare ror iry a lema Yahudi-nare. Ma iry a lema Yahudi-nare sir ne lulswa lema robak ma rhe Hulasokwe, keskye selsel ne ratot ksala ma mlay a sir ti Hulasokwe ne de, kali rtohak ti Kristuske. Klala iry a Yahudi-nare, biar ma sir neke robak a ksala ma mlay a sir ti Hulasokwe, keskye lema ratot ksala mlay raobak desy, kali lema rbuma rtohak ti Kristuske (9:30-33). Ode khyali klolan Yahudi-nare lema rtohak ti Kristuske ne, dendye Hulasokwe yal eraske ti klolan salik nekre (11:11-12). Keskyede ana kyait sekwe bonyo, Hulasokwe ana yaorif iry Yahudi-nare dakun (11:26).

Ode ti pasal hean a kresi enaruke (Rm. 12), Paulus tyanuk ktela mamunmunake ti iry matohak ity ne ma tamorif ne, neke: Musti mo tal ity tenatare mumu ti Hulasokwe ma kyala Hula-

sokwe ralake ma kimukmuka i. Ode kete tlura ma iry lema mahe Hulasokwe ne rhury a ity, ma ttoha sir ti nam kyalamo rarekan o raala ti nuske ktem ne. De musti mo tlura ity ma Hulasokwe yaharw a ity ti nam tarekanare, ma ity wait mormyorifare harharw, mamode nenmo bisa ma the bain-bain nam Hulasokwe ibuma taalanare. Nam Hulasokwe ibu desikre eras, ode mlay, ode kyala ralake ma kimukmuka i.

Ode ti atyahy ne dakun o Paulus lyosu ti ribun matohak mamin ti nus lan Romake ohe, myaboka ksyalik ma byuma inal a yor sir. Dendye yobak klelan a eraske it ma byai Spanyol, mamode bisa ma syery ei Roma, ma ti syeak a sir ma yor sir ti desy sekwe enai ne aduk.

Atyahy ne kisike kolnye

1. Paulus wasi tun mamuna ti atyahy a ikeskye (*Rm. 1:1-15*).
2. Brit Eras desike Hulasokwe amalkyauke desy ma kyaorif iry a matohakare (*Rm. 1:16-17*).
3. Irkye sal i kali biar ma hye ohe Hulasokwe imin, keskye lema byuma tyoha I (*Rm. 1:18-20*).
4. Irkye mlay i ti Hulasokwe kali tyohak ti Yesu Kristuske (*Rm. 3:21-5:21*).
5. Kete tlura ma lim o sal khyareta ity tenatare de (*Rm. 6*).
6. Tnyetak Musake lema kyety eta ity de (*Rm. 7*).
7. Hulasokwe Memeanke khyareta ity ralat a kralanare ma tamorif ne bisa ma ttoha Hulasokwe ibuke (*Rm. 8*).
8. Hulasokwe yilik irire ma ktyoha wasi rekryekkye bo, biar ma iry a Yahudi sir ta iry a lema Yahudi sir dakun (*Rm. 9-11*).

9. Tal ity ralat a kusunare ma tmorif ti Hulasokwe (*Rm. 12:1-15:13*).
10. Paulus lyosu wasi karya ikarya ti Hulasokwe ne (*Rm. 15:14-33*).
11. Paulus yosa wasi salamke ti ribun matohak mamin ti nus lan Romake (*Rm. 16*).

Paulus wasi tun mamuna ti atyahy ikeskye

¹ Waikw o hatnimakw mamin ti nus lan Romae! Yaw neke Paulus, ma Yesus Kristus[†] wasi at yaw. Ode Hulasokwe yilik yaw ma kuka nyaso ti Yesuske, ode syusu yaw ma ti kabrita Brit Eras manosy Hulasokwe ti irire mumu.

² Brit Eras desike heitlulswu Hulasokwe ihate-tak ti wasi irire de. Ode Brit Eras neke heitlulswu Hulasokwe lyosu ti iry manety wasi nyanoare, ma sir ne rakesy ti Kitab Nelnyelkye kralake ne.

³ Brit Eras rakesy desike klyosu Hulasokwe Ananke. Ma I neke irkye idur hahak I ma yola irkye. I neke raja Daud tesnwo natu I.

⁴ Ode Hulasokwe syusu ohe, I neke Hulasokwe Anan a I, ti kyoat Hulasokwe Memeanke kalmalkyauke kiala I ma imorif huruk toha iry matimati ne. I neke Yesus Kristuske, ma ity wait Amam Lan a I.

[†] **1:1 1:1** Kmata *Kristus* ne, neke tel Yunanike desy. Klala ti tel Ibranike, desikeo rbohe, *Mesias*. Tunke khatu deru ne kbuanke mais, neke ti tel Maslyarkwe, kbuanke o, *Iry a Hulasokwe isusu ma ika Raja ode yaorif irkye*. Ode ti ayat neke ti tel Yunanike, any a *Yesus Kristus* neke Paulus kyesy o *Kristus Yesuske*. Paulus kyesy kolnye ma klyosu ohe Yesuske wasi kmatake desy. Ode ma mhye o ti kitabke krala ne ayatare dum Paulus kyesy o “Kristus Yesuske,” ode ti ayatare dum dakun o Paulus kyesy o “Yesus Kristuske.” Klala ti tel Maslyarkwe desyo kyalamo tkesy o “Yesus Kristuske” bo.

⁵ Ode kyosy a I, dendye Hulasokwe syusu rala eraske ma yaw, ma yilik yaw ma kuka nyaso ti Yesuske. Dendye Yesuske yaso yaw ma ti kabrita Brit Eraske ti iry a lema Yahudi-nare mumu, ti bangsa kabei ta kabei bo, mamode sir ne rtohak ode rtoha I, ma rleru o rbitil Anike.

⁶ Ode ei ne dakun ti nus lan Roma ne, Hulasokwe yilik e de, ma Yesus Kristuske wasi iry a e dakun de.

⁷ Lemadendye waikw o hatnimakw mamin ti nus lan Roma e! Kkwesy atyahy ne ti e, neke ti iry a Hulasokwe ilobak ode ilik sir ma wasi iry a sir ne! Kuten ma lemamo eras manosy ity Amat Hulasokwe, yor Anan ity Ebut Yesus Kristuske kimin a e. Ode kuten huruk ma inaka eras manosy Hulasokwe, ode manosy Kristuske, neke kyor e ma kimin ti ralamy kralanare mumu dakun.

Paulus byuma byai nus lan Romake ma yabrita Brit Eraske

⁸ Waikw o hatnimakw e! Lenla kswaur tunakure bai lulkwe, desikeo khyehyei neke kswalak eraske ba ti wasikw Hulasokwe khyali e. Bisa ma kala koldyesy, khyali nam Yesus Kristuske iala ma ity ne. Ode kswalak eraske ba ti I, kali iry mamin ti hnu kabei ta kabei ti nuske ktem ne, neke rahes wasimy tohtohakke ti mitohak ti Kristuske ne.

⁹ Ode Hulasokwe hye ohe, kyaki-kyaki ne kswambayan ti I kali khyali e. Hulasow neke I ne kunal ralakkwe kralake bain-bain ma kukarya ti I ne, neke kabrita Brit Eraske khyali Anan Yesus Kristuske.

¹⁰ Ode ti wasikw sambayan desikre kyaki-kyaki ne kuten toha Hulasokwe ma yal klelan eraske it ma yaw, ma ana lema soso bonyo, bisa ma kbwa ti ksweak a e ti desy.

¹¹ Kali kmwaboka e a ksyalik ma kbwuma ti kait e ti desy, ma kal eras manosy Hulasokwe Memeanke ti e, ma kyalkyaw wasimy tohtohakke ma ktyabal a ktyabal toha.

¹² Neke kbuanke o kyoat kor a e ti desy, desikeo ei neke myalkyaw ralakkwe kralake, khyali wasimy tohtohakke. Ode yaw dakun o kalkyaw ralamy kralanare, khyali wasikw tohtohakke dakun. Lemade ity neke ana it de yalkyaw it rala ma desy.

¹³ Waikw o hatnimakw e, kbwuma ei neke mhye bain-bain ohe, kyala kyosy kabei de, neke krweky ma kbwa ti kait a e ti desy, keskye nam dum a kbya etno eta yaw nggora. Ode kubuma ti kunait e ti desy, mamode bisa ma wasikw karya neke kika kbuan ti e, ma wasimy tohtohakke ti Kristuske ne ktyabal ma malkyakaw, ode iry salik mamin ti Roma desikre ana rtohak ti Kristuske dakun, kola dene iry a lema Yahudi mamin ti wen salno salik nekre rtohak ti Kristuske dakun de, khyali wasikw karya ne.

¹⁴ Kali Hulasokwe yaso yaw ma ti kabrita Brit Eraske ti iry a lema Yahudi-nare mumu. Dendye musti mo kbwa ti kabrita Brit Eras desy ti iry a mamin ti kota-nare, ode iry a mamin ti hnuare, ode iry a maskolare, ode iry a lema maskolare dakun.

¹⁵ Kali koldyesike mane kdwakin a ksyalik ma kbwa ti kabrita Brit Eraske ti e dakun, ti nus lan Roma desy.

Brit Eras desike Hulasokwe amalkyauke desy ma kyaorif iry a matohakare

¹⁶ Ode yaw neke lema kmway ma kabrita Brit Eras desy, kali Brit Eras desike Hulasokwe amalkyauke desy, ma kyaorif iry a matohakare mumu. Brit Eras desike iry Yahudi-nare rtomolu kmuna de, maktei o nenmo iry a lema Yahudi-nare rtomolu kyosy lyakwe.

¹⁷ Kali Brit Eras desike klyosu ohe, kolkyabei ma irkye bisa ma mlay a i ti Hulasokwe, neke cuma mo kali tyohak ti Hulasokwe. Ktela desike kola ne rakesy ti Kitab Lanke ma kbyohe, “Iry a Hulasokwe byohe mlay a sir ne, neke ana rmorif nini nam, kali rtihak ti Hulasokwe.”

Irkye sal i kali biar ma hye ohe Hulasokwe imin keskye lema byuma tyoha I

¹⁸ Hulasokwe syusu keyerake kyosy wen sra eraske, ma yukun iry a lema mabuma matoha nam Hulasokwe ibuke, ror iry a maala ktela atyat nekre mumu ne. Hulasokwe yala koldyesy, kali iry desikre wait ktela atyat desikre ne kiba etno eta irkye, ma khyury ma irkye lema hye nam a mlay Hulasokwe iajarare.

¹⁹ Hulasokwe yukun sir koldyesy, kali nam a bisa ma tahe ma kilosu Hulasokwe ne, neke irkye hye elik de. Kali nam desike Hulasokwe myesan a syusu ti irire mumu de.

²⁰ Kali biar ma lema bisa ma tmatakit Hulasokwe, keskye kyosy a iala nuske ktem ne mumu ne, dendye bisa ma the o Hulasow ne yoly kabei. Kali kyosy nam iala nekre mumu ne bisa ma the ohe, wasi haretke kyal nini nam, ode bisa ma the ohe, I ne Hulasow a I. Dendye lema irkye it a bisa ma yalak tenanke ma tyanuk de byohe, “Yaw ne, lema sal yaw, kali lema khwe ohe Hulasokwe imin!”

²¹ Keskye lema koldyesy, kali irire mumu ne rhe ohe Hulasokwe imin de, keskye lema rleru I o Hulasow a I, ta lema rsalak eraske ba ti I, de rrekan nam a ktem lema maka kbuanare, ode ralat a kralanare kimin ti kelerakokke bo.

²² Iry desikre rbohe rhe ei lulw o lyaw, keskye iry desikre ktem a sir.

²³ Ode rsambayan o rou ti adar a raka sir ma rola dene iry o, manu o, heal malamy o, heal a lwau deat nekre, biar ma rhe ohe, iry o heal o ail desikre mumu ne ana rmaty ma rabtasy dakun. Klala lema rbuma rsambayan o rou ti Hulasow Lan Lahuk a lema bisa ma imaty ne.

²⁴ Lemadendye Hulasokwe tyutuk lakhidik iry desikre, ma wait ktela atyat radakin ma raala nekre khyareta sir. Mane kihury ma it de yor it ne, rala ktela maray a manety inamnyekunare ne.

²⁵ Hulasokwe yala koldyesy, kali lema rtoha nam a mlay Hulasokwe iajarare, de reluk nam a mlay Hulasokwe iajar desikre kyor nam lema mlaire. Ode lema rbuma rsakitil ode rou ti Hulasow a maala lait o lasmyer ne, ode lema rbuma rtoha ma rsambayan ti I. De rbuma rsambayan

ti nam a Hulasokwe iala nekre bo. Keskyede Hulasow maala lait o lasmyer ne, I neke myesan a byer o tyahal, ma irire mumu ne musti mo rleru Anike ti kiba knaru ne. Amin.

²⁶ Kali koldyesike mane Hulasokwe tyutuk lakhidik sir, ma wait dakdyakin atyat manety inamnyeku desikre khyareta sir. Mane khyury ma wamfwetare lema rdakin ma renaf ror wamwanire, ma ktyoha ktela kyalamo irkye ialake, de rdakin ma renaf ror wamfwetare bo.

²⁷ Kola dene wamwanire dakun, ma lema rdakin ma renaf ror wamfwetare, ma ktyoha ktela kyalamo irkye ialake, de rmaboka wamwanire ma renaf ror sir bo, ma rala ktela maray manety inamnyekunare. Lemadendye Hulasokwe yoil ma yala masunkwe ma kdyan sir, ma ktyoha wait a ktela atyat raala desikre.

²⁸ Iry desikre dakun o lema rhaduli ma rhe Hulasokwe de. Dendye Hulasokwe tyutuk lakhidik sir, ma nam atyat rarekan desikre khyareta sir bo. Mane kihury ma rala ktela atyatare, ma lema kola ktela mlay a irkye musti mo iala nekre.

²⁹ Mane wait mormyorifare kbyenw ti ktela atyat salno salik nekre, neke: rala ktela lema mlaire, rahatw, robak ma ramesa namit-namit, rala irire ma ralatare ksunw, rsoi ralat, rtabahunw iry, it de syorw sala it ma khyury ma railir, rdakin ma rakakmet a irire, raatil iry, ode rdakin ma rahes irire.

³⁰ Ode rala irire ma anitare kiray, ramnisik Hulasokwe, rahmway irire, rbitil tenatare ma atat, ratun bakbak, robak ksala harharw ma rala ktela atyat sai ta sai bo, ode lema rtomolu enat o amat dakun.

³¹ Ode rrekan a kdusake bo, ode tun ratetakare lema rtoha ma rala, ode lema ralobak iry, ode lema rala ral eraske ror irire.

³² Ode biar ma rhe Hulasokwe wasi tnyetakke de, ti kibohe, kolnye iry a maala tot atyat maoly desikre, Hulasokwe musti mo tyunik tnyetak matmyatkye ti sir, keskyede iry desikre kyaki-kyaki ne rala ktela atyat desikre ba bo. Ode lema rala koldyesy kmyesan bo, de ramukmuka sir, ti kolnye iry salik rala ktela atyat desikre dakun.

2

Hulasokwe yukun irire mumu ne wait tunare

¹ Lemadendye waikw o hatnimakw e, the ohe ana Hulasokwe yukun iry maala ktela atyat desikre. Keskye kolnye myoit sal ti iry desikre, desikeo lema bisa ma myalak tenamire toha ukunke, kali ei ne dakun o myala ktela sal maoly desikre. Dendye kolnye myoit sal ti iry salik, desikeo kola dene mmyesan a miten Hulasokwe ma yukun e ma desy.

² Ode ity neke the ohe, Hulasokwe lema iseak mat, de tyoha mlakye bo, ti kyoat yukun iry maala tot atyat desikre.

³ Dendye kolnye myoit sal ti irire, keskye ei neke myala ktela sal maoly desikre dakun, desikeo mryekan o bisa ma mila toha Hulasokwe wasi ukunke e?

⁴ Anakyai lema mhyaduli ohe Hulasokwe syusu rala eraske ma mausw ksyalik ti e, ode yala ralake ma lublub ma kete samlurw o ika keyer de ikita bo. Keskye musti mo mhye ohe Hulasokwe syusu

rala eraske ti e, kali byuma ei ne mtyunik wasimy lim o sal nekre ba.

⁵ Keskyede ei neke usumy khatu malkyakaw ma, lema mbyuma mtyunik wasimy lim o sal nekre ba. Kali koldyesike mane ei ne mmyesan a mtyabal ukunke ti tenamire ma desy. Ode ana kyait sekwe ma Hulasokwe syusu keyerake ode yukun tun ti irkye, desikeo ksyusu ohe nam Hulasokwe ialake mlay.

⁶ Kyoat desike ana Hulasokwe yoil ti irire it o it, ma ktyoha totnyo yabit raalanare.

⁷ Neke ana Hulasokwe yal mormyorif manal nini namke ti iry a ralkyaw ralatare manenen ma rala ktela erasare ne, mamode Hulasokwe byitil o lyeru sir, ode yal mormyorif manal nini namke ti sir dakun.

⁸ Klala ana syusu keyerake ma yukun iry a marekan tenatare kimesan ne, ode lema rbuma rtoha nam a mlaire, de rbuma rtoha ktela atyatare bo.

⁹ Ma esei ta esei bo, ma kyaki-kyaki ne ialala ktela atyatare, desikeo ana Hulasokwe yal masunw lan ne ma kdyan i. Neke kmunmunmuna ne, ti iry a Yahudi-nare, ode ti iry a lema Yahudi-nare dakun.

¹⁰ Klala esei ta esei bo, ma kyaki-kyaki ne ialala ktela erasare, desikeo ana Hulasokwe byitil o lyeru i, ode yal wasi inaka eraske ti i, ma kimin ti ralake kralake. Neke kmunmunmuna ne, ti iry a Yahudi-nare, ode ti iry a lema Yahudi-nare dakun.

¹¹ Kali Hulasokwe lema iseak mat.

¹² Iry a Yahudi-nare rhe tnyetak Musake. Ode kolnye rbilak tnyetak Musa desy, desikeo ana Hulasokwe yal tnyetak Musa desy ma yal ma yukun sir, ma yotuk sir bai mamaty rala, neke wen a ay malehur manal nini nam tike, kali rala lim o sal ma desy. Klala Hulasokwe lema yal tnyetak Musake ma yal ma yukun iry a lema Yahudi-nare, kali iry desikre lema rhe tnyetak Musake. De kolnye iry a lema Yahudi desikre rala ktela a ralat a kralanare kibohe ktela desike sal ne, desikeo ana Hulasokwe yal ralat a krala kibohe rala sal desy, ma yal ma yukun sir, ma yotuk sir bai mamaty rala, neke wen a ay malehur manal nini nam tike, kali rala lim o sal ma desy.

¹³ Kali irkye mlay a i ti Hulasokwe, neke lema khyali hye tnyetak Musake. De Hulasokwe yohut ohe, irkye mlay a i, kali lyakut ma tyoha tnyetak Musa desy.

¹⁴ Ode mlay bain, iry a lema Yahudi-nare lema rhe tnyetak Musake elik. Keskyede kolnye ralat a kralanare kyajar sir ma rala ktela erasare, ma kola tnyetak Musa desy, desike ne ksyusu ohe, Hulasokwe wasi tnyetakare kimin ti ralat a kralanare de.

¹⁵ Ode iry desikre totnyo yabitare ksyusu ohe nam a Hulasokwe itetak ti irkye ne, kimin ti ralat a kralanare de. Kali ralat a kralanare kyor nam rarekanare ktyanuk ohe, ktela raala nekre mlay ta sal.

¹⁶ Lemadendye ana kyait sekwe ma Hulasokwe yukun irkye, desikeo Hulasokwe yal haretke ti Yesus Kristuske, ma yukun sir ma ktyoha nam rarekan o raala nekre, ma ti kyal nam rahunik

ti ralat a kralanare ne dakun. Ode Brit Eras kuabrita desy klyosu ohe, ana Hulasokwe yukun sir koldyesy dakun.

Tnyetak Musake ktyabal ratosa tenatare ne lema kyaorif iry a Yahudi-nare

¹⁷ Waikw o hatnimakw iry a Yahudi e! Ei neke mbyohe, iry a Yahudi e. Ode mryekan ohe, kolnye mtyoha tnyetak Musake, desikeo ana Hulasokwe yaorif e. Ode mbyitil tenamire ma atat, kali mryekan ohe, ei neke Hulasokwe wasi iry a e de.

¹⁸ Ode irire rajar tnyetak Musake ti e ma mhye de, dendye mhye nam Hulasokwe ibuare de, ode mryekan ohe, bisa ma myilik a mhye eraske toha atyatke.

¹⁹ Ode mtyohak tenamire ohe, ei neke bisa ma myeuk iry a matmabolare, ode myeluk a made-lafke ti iry a mamin ti kelerakokare.

²⁰ Ode mryekan ohe, mhye tnyetak Musake de, dendye mryekan ohe, ei ne mhye telke ma mhye nam a mlaire mumu dakun de. Dendye mtyohak tenamire ohe, ei neke tuanggurw a e de, ma bisa ma myajar iry a ktemare, ode iry a lenla mahe nam a mlaire ne.

²¹ Dendye kolkyabei mane bisa ma myajar iry salik, klala lema bisa ma myajar tenamire kmyesan ne de? Ode ei ne myajar iry salik ma kete ranamet, ode kyanmwane ei ne mmyesan a minamet ne de?

²² Ode myajar irire ma kete raldotw, ode kyanmwane mmyesan a mialdotw ne de?! Ode ei ne mimnyeku adarare, ode kyanmwane ei ne mmyesan a minamet namit-namit toha adar desikre seitare ne de?

²³ Ode ei neke mbyitil tenamire ma mbyohe, Hulasokwe yal tnyetak Musake ti e ma wasimy, keskyede ei neke mmyesan a mikanak Hulasokwe, kali lema mtyoha tnyetak desy.

²⁴ Iry a Yahudi e ne myala koldyesy, dendye kola dene rakesy ti Kitab Lanke ma kbyohe, “Khyali e, dendye iry a manosy bangsa salik nekre rakanak Hulasokwe Anike, kali ratos nam atyat mialanare.”

²⁵ Lemade iry a Yahudi e, myatosa tenamire* ma ksyusu ohe ei ne Hulasokwe wasi iry a e de. Dendye kolnye mlyakut a mtyoha tnyetak Musake, desikeo miatosa tenamire desy kika kbuan ti e. Keskye kolnye lema mtyoha tnyetak Musake, desikeo miatosa tenamire desy, neke lema kika kbuan ti e. Kola dene lema miatosa tenamire ne bo.

²⁶ Lemadendye iry a lema Yahudi-nare, ma sir neke lema ratosa tenatare, keskye kolnye rtoha nam tnyetak Musake kitanukke, desikemo Hulasokwe yohut ohe, sir desike wasi iry a sir, kola iry a raatosa tenatare ne.

²⁷ Koldyesike mane ktela iry a lema Yahudi-nare raala desike ksyusu ohe, iry a Yahudi e ne myala sal ma desy. Kali ei ne wasimy a tnyetak rakeskye, ode myatosa tenamire de, keskyede lema mtyoha tnyetak Musake. Klala sir neke lema ratosa tenatare, keskye sir neke rtoha tnyetak Musake.

²⁸ Lemadendye klwosu ti e ohe, Hulasokwe byohe, iry a Yahudi i bain-bain ne, neke lema khyali

2:24 2:24 Yes. 52:5 * **2:25 2:25** Tunke khatu kibohe *myatosa tenamire*, neke ti tel mabuske kbyohe, *sunat*. Kola ne ti Rm. 2:26,27,28ke dakun.

radur i toha klolan a Yahudike, ode lema khyali raatosa tenanke ne.

²⁹ De iry a Yahudi i bain-bain ne, neke iry a Hulasokwe Memeanke kiaharw a ralake kralake ne. Iry neke Hulasokwe wasi iry a i, neke lema kali hye tnyetak Musake. De i neke Hulasokwe wasi iry a i, kali Hulasokwe Memeanke kyaharw a ralake kralake de. Mane iry maoly desikre ana Hulasokwe lyeru sir, biar ma irkye lema lyeru sir.

3

Hulasokwe yukun irkye ne lema iseak mat

¹ Lemadendye the ohe, ktela raatosa tenatare* ne lema bisa ma kyala irkye ma Hulasokwe wasi iry a i. Koldyesikemo Hulasokwe yal eras sai ti iry manosy klolan Yahudike ma kbyilak iry salik de? Ode raatosa tenatare ne kyety eras sai ti sir dakun de?

² Keskyede mlay bain o iry a Yahudi-nare ratot eras ribun sai ta sai toha Hulasokwe. Kali heitlulswa Hulasokwe yal tunanare ti iry a Yahudi-nare a kmuna, ma rkesy tuna desikre ti Kitab Lanke, ode rajaga mamamak.

³ Keskye iry a Yahudi-nare dum a lema ratotomolu tel. Koldyesike mane, ktela desike khyury ma Hulasokwe lema tyoha nam itanukare e?

⁴ Lema elik! Kali nam sai desy Hulasokwe tyanuk, nam desikre mumu ne mlay, biar ma irire mumu ne rakakmet dakun. Kola ne rakesy ti Kitab Lanke ma klyosu Hulasokwe ma kbyohe,

2:29 2:29 Ul. 30:6 * **3:1 3:1** Tunke khatu kibohe *raatosa tenatare*, neke ti tel mabuske kbyohe, *sunat*. **3:4 3:4** Mzm. 51:6

“Hulasow O, nam sai mtwanuk, desikeo mlay.
Ode kyait ma mukun tun, desikeo irire lema bisa
ma rbohe, muukun tun ne sal.
Kali irire mumu ne bisa ma ratos ohe, Oi neke
mlay a O ti muukun tun ne.”

⁵ Keskye anakyai irkye byohe, “Ity wait lim o sal
kika kbuan, kali bisa ma ksyusu ohe, Hulasokwe
mlay a I ksyalik ma kbyilak ity.”

Desikeo ana ttanuk kolkya? Bisa ma ttanuk
ohe, “Hulasokwe lema mlay a I, kali kyeyer mane
yukun ity, khyali ity wait lim o sal desikre e?”

Lema koldyesy! Kali cuma mo irkye myesan
ryekan koldyesy bo!

⁶ Ode nam irkye irekan desikre lema mlay! Kali
kolnye Hulasokwe lema mlay a I ti iukun tun
ne, desikemo kolkyabei ma bisa ma yukun nuske
ktem ne mumu de?

⁷ Keskye anakyai irkye tyanuk ma byohe, “Kol-
nye ity neke takakmet a irire, desikeo ktela takak-
met desike ana ksyusu ohe, Hulasokwe mlay a I
ksyalik ma kbyilak ity. Kali kolnye tlaui ity neke
tor Hulasokwe, ana irire mumu ne bisa ma ratos
ohe Hulasokwe lema yola ity, de mlay a I a ksyalik.
Dendye khyury ma irire rleru I, kali mlay a I.
Koldyesikemo kyanmwane Hulasokwe iukun ity
khyali ity wait lim o sal desy ne de?”

⁸ Keskye ktela irkye itanuk desike mais kola
dene kolnye tyanuk ma byohe, “Lemamo ity neke
tala ktela atyatare, mamode irire bisa ma ratos
ohe, Hulasokwe lema yola ity, de eras I a ksyalik,
mane ana rleru Hulasokwe Anike.”

Keskye ktela irkye itanuk desike lema mlay. Keskyede irire dum a rahes kakmetatare ma rahmway aramy ma rbohe, aramy neke myajar ktela maoly desy. Dendye mlay bain ma ana Hulasokwe yukun iry matanuk tun maoly desikre, ma kdeda totnyo yabit raalanare.

Irire mumu ne rala lim o sal

⁹ Lemadendye mryekan o iry a Yahudi ity ne eras ity ma tbilak iry a lema Yahudi-nare e? Lema koldyesy! Kali yaw neke klwosu ti e de, ohe lim o sal ne khyareta irire mumu, neke iry a Yahudi-nare ode iry a lema Yahudi-nare dakun.

¹⁰ Kola dene rakesy ti Kitab Lanke ma kbyohe,

“Lema irkye it a mlay a i elik ti Hulasokwe.

¹¹ Ode lema irkye it a hye ei lulw o lyaw ma bisa ma yilik eraske toha atyatke.

Ode lema irkye it a yobak ma hye Hulasokwe dakun.

¹² Ode irire mumu neke rsanyetat Hulasokwe de, ma lema rber o rtahal.

Ode lema irkye it dakun ma yala ktela mlakye!

¹³ Ode irire hahatare ktyanuk tun atyatare, ma kyoat ratanuk bonyo, wait tun desikre atyat ma khyon busu, kola dene ralakat matmatkye wasi asake mo kihon busu ne.

Ode matare ktyanuk tun kakmet a kiulak de kitalik irire ne.

Ode hihitare ktyanuk tun mew o mlara ma kyala irire ralatare ma ksunw, kola ne manunkwe ikuty a ity ne.

14 Ode nunutare ksyusno ksyoba irire, ode kbyenw ti tun inahmway irkye.

15 Ode rdakin ma robak a ksala ma rtabahunw iry.

16 Ode kolnye rbai wen kabei ta kabei bo, desikeo rahnutuk sai ta sai bo, ode rahdawan irire ma masunkwe kdyan sir.

17 Ode lema rala rhe ma raka eras ror irire.

18 Ode lema ramtaut Hulasokwe dakun.”

19 Ode ity neke the ohe, tun rakesy ti Hulasokwe wasi tnyetak desy, neke rkesy ti iry a Yahudi mahe tnyetak Musake. Lemadendye ti iry a lema Yahudi-nare, ode iry a Yahudi e ne dakun, ma ti lui deru ne lema irkye it a mlay a i ti Hulasokwe elik. Kali irire mumu ti nuske ktem ne, neke raka wait lim o sal. Koldyesikemo lema irkye it a bisa ma yalak tenanke toha Hulasokwe wasi ukunke.

20 Dendye ktela tatoha Hulasokwe wasi tnyetakke ne, lema bisa ma kyala irkye it dakun ma mlay a i ti Hulasokwe. Keskyede Hulasokwe yal wasi tnyetakke ma ity, mamode bisa ma the ohe, ity neke taka ity wait lim o sal.

Irkye mlay i ti Hulasokwe kali tyohak ti Yesu Kristuske

21 Keskye selsel neke Hulasokwe syusu ksalake it, ma irkye bisa ma mlay a i ti Hulasokwe, neke lema khyali itoha tnyetak Musake ne. De ksala Hulasokwe isusuke kola ne rakesy ti tnyetak Musake, ode rakesy ti iry manety Hulasokwe wasi nyanoare wait kitabare dakun.

²² Neke ksyusu ohe: ti ksala irkye mlay a i ti Hulasokwe ne, neke cuma mo irkye tyohak ti Yesus Kristuske bo. Ode esei ta esei bo ma tyohak ti Kristuske, desikemo Hulasokwe yohut ohe, iry desike mlay a i. Kali ti Hulasokwe ne, irire mumu neke mais-mais sir bo,

²³ kali irire mumu ne rala lim o sal, dendye soso sir toha Hulasokwe wasi madelafke de.

²⁴ Keskyede selsel ne kyosy a Hulasokwe rala eraske, dendye yohut ohe, mlay a ity ti I ne, neke lema khyali nam taalanare, kali nam taalanare lema bisa ma ktyuny kyal Hulasokwe rala eras inal ma ity ne. De Hulasokwe yohut ohe, mlay a ity ti I ne, neke khyali inal Anan Yesus Kristuske ma imaty ma ilitan eta ity ne.

²⁵⁻²⁶ Neke Hulasokwe yaso Anan Yesus Kristuske ma myaty ti tul masanwalw ike, ma larake kibo ei hahke, ma kolnye ttohak ti Yesuske, desikeo Hulasokwe syos ity wait lim o sal nekre ba. Heitlulswo lenla Yesuske imai nuske ktem ne, desikeo Hulasokwe ineti ralake ma ikita ma yukun irkye ti khyali wait lim o sal, kali lema sam-lurw o kyeyer. Keskye selsel ne syusu keyerake ti irkye ti iala lim o sal ne, ma ksyusu ohe wasi ukunke mlay, kali lema imluak irkye wasi lim o sal. Dendye Hulasokwe yal irkye wasi lim o sal desikre, ma yal ti Yesuske ma myaty ma lyitan eta irkye ti wasi lim o sal desy. Hulasokwe yal Yesuske ma yeluk ity, ma Hulasokwe lema yukun ity, de yukun Yesuske khyali ity wait lim o sal. Ode ktela Anan Yesus Kristuske imaty desy, ksyusu ohe Hulasokwe mlay a I. Ode the ohe Hulasokwe

wasi haretke ma yala iry maala lim o salare ma mlay a sir ti I, kolnye rtohak ti Yesuske.

²⁷ Lemadendye lema bisa ma tbitil ity tenatare ma atat, khyali ktela eras taalanare. Kali Hulasokwe byohe mlay a ity, neke khyali tatohak ti Yesuske ne, de lema khyali ktela eras taalanare, ta lema khyali tatoha tnyetak Musake ne.

²⁸ Dendye lema bisa ma tbitil ity tenatare ma atat, kali the ohe, mlay a ity ti Hulasokwe, neke khyali ttohak ti Yesus Kristuske bo, de lema khyali talkyaw ity ma tatoha tnyetak Musake kibuare ne.

²⁹ Dendye kete mryekan o Hulasow neke Hulasow a I ti iry a Yahudi-nare bo. Keskyede musti mo mhye bain-bain ohe, Hulasow neke Hulasow a I ti irire mumu ti nuske ktem ne, neke ti iry a Yahudi-nare dete lemamo ti iry a lema Yahudi-nare dakun.

³⁰ Kali Hulasow neke sasasam I bo. I ne ibohe iry a Yahudi-nare, ode iry a lema Yahudi-nare dakun o, raktemtem ne mlay a sir, kolnye rtohak ti Yesus Kristuske.

³¹ Koldyesikemo, anakyai mryekan o ity neke bisa ma totuk tnyetak Musake ba e? Lema koldyesy! De kyosy ity wait tohtohakke, nenmo bisa ma toha ma tala tnyetak Musake mumu ne wasi kbabaake.

4

Abraham neke iry a mlay i khyali wasi tohtohakke

¹ Lemadendye waikw o hatnimakw e, tatos ti iry a Yahudi-nare musut Abraham. Kolkyabei mane

Hulasokwe byohe Abraham neke iry mlay a i ne de?

² Kolnye Abraham neke iry mlay a i ti Hulasokwe, khyali ktela eras ialanare, desikemo bisa ma byitil tenanke. Keskye ktela eras Abraham ialanare, neke lema khyury ma iry mlay a i. Mane Abraham lema bisa ma byitil tenanke daku Hulasokwe.

³ Kali rkesy ti Kitab Lanke ma kbyohe, “Abraham tyohak ti Hulasokwe, dendye Hulasokwe byohe Abraham neke iry mlakye.”

⁴ Kola ne irkye it ma kyarya ode ral wasi katkye ti i, desikeo wasi katy desike lema hadiake desy, de maslyesanke desy.

⁵ Keskye kolnye ttanuk ti khyali ktela Hulasokwe iohut ma irkye mlay a i ti Hulasokwe ne, desikeo ktela desike lema kola dene iry makaryake ma ral wasi katkye ti i. Kali kolnye irkye it a myea ti ktela eras ialanare, kali ryekan o ana Hulasokwe yohut ohe, i desike mlay a i ti Hulasokwe khyali ktela eras iala desy, desikemo ktela desike kola dene iry makaryake ma ranal wasi katkye ti i ne. Keskyede lema koldyesy, de Hulasokwe yohut ohe, iry mahatw ity ne ana mlay a ity ti Hulasokwe ne, neke cuma mo khyali ity wait tohtohakke bo. Dendye Hulasokwe byohe ity neke mlay a ity, neke kola dene hadiake ma ity ma desy.

⁶ Kola dene raja Daud kyesy ti kitabke dakun ti khyali iry a mamukmuka ike, kali Hulasokwe yohut ohe iry desike mlay a i ti Hulasokwe, neke lema khyali ktela eras ialanare. Lemadendye Daud tyanuk ma byohe,

- 7 “Eraske ti iry a Hulasokwe isos salatare ba ne,
ode iry a Hulasokwe iaditi wait lim o sal ne.
8 Ode eraske ti iry a ity Ebutke lema irekan wait
lim o salare ti sir ne de.”

Hulasokwe yohut ohe Abraham mlay a i ti Hulasokwe ti kyoat lenla raatosa tenanke ne

9 Tun eras raja Daud itanuk neke lema tyanuk ti iry a raatosa tenatare* ne rmesan, de tyanuk ti iry a lema raatosa tenatare ne dakun. Desike ne kola ne nam dai kutanuk desikre, neke Abraham tyohak ti Hulasokwe, dendye Hulasokwe byohe, “Abraham neke iry mlakye.”

10 Ode hekyab ne Hulasokwe byohe Abraham ne iry mlay a i ne de? Ode Hulasokwe byohe mlay a i ne kyoat raatosa tenanke ne, ta lenla raatosa tenanke ne de? Abraham neke Hulasokwe byohe iry mlay a i, ti kyoat lenla raatosa tenanke ne.

11 Lemadendye Abraham neke tyohak ti Hulasokwe a kmuna, maktei o nenmo ratosa tenanke. Kali kyoat raatosa tenanke desy, neke kola dene Hulasokwe lyatan metraiike ti iry a raatosa desy, ma kyeluk nyatos ma ksyusu ohe, Hulasokwe yohut de ma Abraham neke iry a mlay i, kali tyohak ti Hulasokwe. Lemade Abraham neke, iry a lema Yahudi matohak a lema ratosa tenatare mumu ne, amat a i, kali sir desike rtihak kola Abraham. Lemadendye Hulasokwe yohut ohe, sir desike dakun o iry mlay a sir.

4:7 4:7 Mzm. 32:1-2 * 4:9 4:9 Tunke khatu kibohe, *raatosa tenatare*, neke ti tel mabuske kbyohe, *sunat*. Kola ne ti Rm. 4:9,10,11,12ke dakun. 4:11 4:11 Kej. 17:10

¹² Ode iry a Yahudi ma raatosa tenatare ne ana amat a Abraham dakun, kolnye rtohak ti Hulasokwe, kola dene ity musut Abraham itohak ti Hulasokwe ne, ti kyoat lenla raatosa tenanke ne.

Hulasokwe ihatetak ma yal eraske ti Abraham khyali wasi tohtohakke

¹³ Heitlulswo Hulasokwe ihatetak de, ma yal nuske ktem ne mumu ti Abraham yor tesnwo natu nekre ma wait. Hulasokwe yal eras ihatetak desy ti Abraham, neke lema khyali itoha tnyetak Musake ne, de ti khyali itohak ti Hulasokwe ne. Dendye Hulasokwe byohe, Abraham neke iry mlakye.

¹⁴ Kali kolnye Hulasokwe yal eras ihatetakke ti irkye khyali itoha tnyetak Musake ne, desikemo ity a matohak ti Hulasokwe ne, ity wait tohtohakke lema kika kbuan, ode Hulasokwe wasi inahatetak desike lema kika kbuan dakun, de kdi hah bo. Keskyede lema koldyesy!

¹⁵ Kali lema irkye it a bisa ma tyoha tnyetak Musake mumu. Dendye kyoat irkye lema tyoha tnyetak Musa desy, desikeo khyury ma Hulasokwe kyeyer ma yukun i. Keskyede kolnye lema kika tnyetak Musake, desikeo lema kika tnyetak ma irkye byilak dakun.

¹⁶ Khyali desike mane, Hulasokwe yal eras ihatetak desike ma ity, neke kyosy rala eraske kmyesan, kali ttohak ti I. Mane yal ti Abraham tesnwo natu nekre mumu, neke esei ta esei bo ma rtohak kola Abraham. Biar ma iry a Yahudi mahe

tnyetak Musake, dete lemamo iry a lema Yahudinare dakun. Kali Abraham neke iry matohakare mumu ne ity amat a i.

¹⁷ Kola dene Hulasokwe tyanuk ti Abraham, neke rkesy ti Kitab Lanke kralake ma kbyohe, “Kohut de ma ana tesnwo natumw nekre ribun sir, ma rala bangsa-nare ma ribun ti lasmyerke khaha ne, ode iry mamin ti bangsa desikre ne, amat a o.” Dendye Hulasokwe byohe, Abraham neke, iry matohak ity mumu ne, ity amat a i. Kali Abraham tyohak ti Hulasokwe. Hulasow neke I ne iala mamatire ma rmorif, ode I ne iala nam a lenla mamin nekre ma kimin, neke cuma mo tyanuk bo, desyo nam desike kimin elik.

¹⁸ Kyoat desike Abraham hye ohe, lema bisa ma ika anan de, keskyede i neke tyohak ti Hulasokwe manenen ti tnyetak Hulasokwe ihatetak inor i desy, ma ana tesnwo natu nekre ribun sir, ma rala bangsa-nare ma ribun ti lasmyerke khaha ne, ode iry mamin ti bangsa desikre ne, amat a i. Kola dene tnyetak Hulasokwe ihatetak inor i ne, ma rakesy ti Kitab Lanke kralake ma kbyohe, “Ana kala o ma tesnwo natumw nekre ribun sir kola thunare o laitke.”

¹⁹ Abraham wasi tohtohakke malkyakaw, biar ma hye ohe amosw a i ma iluh de, kali wasi ainke anakyai nenma kyait atw de. Ode hye dakun ohe sawa Sara neke myakw, ma lema ika anan.

²⁰ Keskye Abraham ralake lema kakan elik, de tyohak manenen ti Hulasokwe wasi hatetak desy bo, ode wasi tohtohakke ktyabal a ktyabal ma malkyakaw, ode lyeru Hulasokwe.

²¹ Abraham neke tyohak bain-bain ohe, Hulasokwe wasi haretke ma yala nam ihatetak desy ma kdi ti.

²² Ode khyali Abraham wasi tohtohak desy, mane rakesy ti Kitab Lanke ma kbyohe, “Hulasokwe byohe, ‘Abraham neke iry a mlakye.’ ”

²³ Tunke khatu rakesy desy, neke lema rkesy ti khyali Abraham myesan bo,

²⁴ de rkesy ti khyali ity dakun. Kali Hulasokwe byohe, ity neke iry mlay a ity dakun, kali tohak ti Hulasow a iala ity Ebut Yesuske ma imorif huruk toha matmyatkye ne.

²⁵ Yesus neke Hulasokwe lyura ma irire rtabahunw a I, khyali ity wait lim o sal. Maktei o yala I ma myorif huruk toha matmyatkye, ma ity neke bisa ma mlay a ity ti Hulasokwe.

5

Hulasokwe ika eras yor ity

¹ Lemadendye waikw o hatnimakw e, Hulasokwe byohe ity neke mlay a ity de, khyali ity wait tohtohakke ti Yesus Kristuske. Ode khyali nam a ity Ebut Yesus Kristuske ialake, dendye Hulasokwe ika eras yor ity de, ma bisa ma wasi inaka eras desy kimin a ity.

² Ode khyali nam Kristuske iala desy, ode khyali ity wait tohtohakke ti I, dendye Hulasokwe syusu rala eraske ma ity, ma selsel ne tety ral sasamke tor I de. Lemade ity neke tamukmuka tamarmara ity ksyalik, kali tmea ti Hulasokwe, ma takita ma ana tmorif tor I ti wasi madelafke.

³ Ma lema desike kmyesan bo, de ity ne tamukmuka tamarmara ity dakun, ti kyoat masunkwe kdyan ity. Kali the ohe masunw madan ity neke, kyala ity ma bisa ma talkyaw ity ralat a kralanare manenen ma takita bo.

⁴ Ode kolnye talkyaw ity ralat a kralanare manenen ti masunw madan ity nekre, desikeo ana ity wait mormyorif desikre, kyala Hulasokwe ralake ma kimukmuka i. Ode kyoat a the ohe, Hulasokwe imukmuka I desy, desikeo ktela desike kyala ity ma ktyabal toha ma tmea ti I, ma takita nam Hulasokwe itetak ma ana inal ma ity ne.

⁵ Ode kolnye tmea ti Hulasokwe, desikeo ana ity ralatare lema kakan de. Kali tkoman Hulasokwe wasi loblobakke ma ity o, mausw ksyalik. Kali Hulasokwe yal Memeanke ma kimin ti ity ralat a kralanare, ma the ohe I neke lyobak a ity ksyalik.

⁶ Hulasokwe wasi loblobakke ma ity ne kolnye: kyoat werke kyait ity telatare de, kali lema bisa ma tбетik toha lim o sal kidan ity ne, dendye kyait sew a Hulasokwe itunikke bonyo, Kristuske myaty khyali ity a tasorw a Hulasokwe ne.

⁷ Ode the ohe ti nuske ktem ne ksunw ksyalik ma irkye it a you ma myaty ma yeluk iry salik, biar ma iry salik desy lema ika sala. Klala anakyai bisa ma irkye sasam ta enaru rares ma rmaty ma reluk iry a ralake eras a ksyalik ne.

⁸ Keskyede kyaki-kyaki ne Hulasokwe syusu wasi loblobakke ma ity. Kali kyoat ity neke tmorif ti lim o sal a nggora, desikeo Kristuske myaty ma lyitan eta ity.

⁹ Dendye selsel ne ity neke mlay a ity ti Hulasokwe, khyali Yesus Kristuske lara mabo ei hahke

ne, ti kyoat imaty ma ilitan eta ity ne. Ode kali koldyesike mane the elik ohe, Kristuske ana yaorif ity toha Hulasokwe keyerake ti ana iukun a nuske ktem ne.

¹⁰ Kali kolnye: kyoat ity neke tsorw a Hulasokwe a nggora, desikeo Hulasokwe ika eras yor ity de, neke kyosy Anan Yesus Kristuske ti imaty ne. Ode kbyilak ti desy dakun o, the ohe kyosy a imorif huruk ne, dendye ana yaorif a ity dakun.

¹¹ Ode lema desike kmyesan bo, de ity neke tamukmuka tamarmara ity dakun, khyali nam Hulasokwe iala ma ity ne, neke kyosy a ity Ebut Yesus Kristuske. Kali kyosy a ity Ebut Yesus Kristuske, mane Hulasokwe ika eras yor ity de.

Paulus ilalau Adam yor Kristuske

¹² Waikw o hatnimakw e! Lim o sal neke kmyai nuske ktem ne, kali irkye it a yala lim o sal, neke Adam. Kali koldyesike mane Adam myaty, mane matmyatkye kimin ti nuske ktem ne. Lemade irire mumu ne ana rmaty, kali irire mumu ne rala lim o sal.

¹³ Kali kyoat tnyetak Musake lenla kimin, desikeo irire ti nus ktem ne rala lim o sal de. Keskyede Hulasokwe lema ryekan ti sir, ti wait lim o sal raala desikre, kali tnyetak Musake lenla kimin.

¹⁴ Ode biar ma koldyesy, keskyede kyala kyosy a taras Adamke, ma ti kyait a taras Musake, irire mumu ne musti mo rmaty, kali rala lim o sal, biar ma lim o sal raalanare, lema kola lim o sal Adam ialake, ti kyoat byilak tnyetak a Hulasokwe itetak ti i desy.

Adam neke myaa kmuna, klala Kristuske nenmo myaa yosy lyakwe. Ode ktela Adam iala desike, kena irire mumu. Kola dene ktela Kristuske iala desike, kena irire mumu dakun.

¹⁵ Keskyede Kristuske rala eras inal ma ity ne, lema kola ktela Adam iala ti kyoat ibilak tnyetak desy. Kali iry sasam neke yala lim o sal, dendye irire mumu ne musti mo rmaty. Klala khyali iry sasamke it dakun, neke Yesus Kristuske, ti isusu rala eraske ti iry ribunke, dendye Hulasokwe rala eras inal ti iry ribunke ne mausw ksyalik. Dendye ktela desike lan a ksyalik, ma kdyan-liha ktela Adam ialake.

¹⁶ Adam neke yala lim o sal, mane Hulasokwe yohut ma tyetak salke ti irkye. Keskye Hulasokwe syusu rala eraske ti iry ribunke, mane yohut ohe mlay a sir, biar ma iry ribun desikre rala lim o sal dakun de. Dendye Hulasokwe rala eras inal ma ity neke, mausw ksyalik ma kbyilak Adam wasi ktela lim o sal iala desy.

¹⁷ Ode khyali irkye it wasi lim o sal, neke Adam, dendye irire mumu ne musti mo rmaty. Keskyede esekar desy rtohak ti Kristuske, desikeo Hulasokwe yal mormyorif manal nini namke ti sir, ode yal haretke ti sir ma ana rhareta ror Kristuske. Desike ne Hulasokwe syusu rala eras mausw ksyalikke ti sir ma desy. Ode Hulasokwe yohut ohe, iry desikre mlay a sir, kola dene yal hadiake ti sir, neke kyosy Yesus Kristuske. Dendye ktela eras Yesus Kristuske iala desy, lan ma kdyan-liha ktela atyat Adam ialake.

¹⁸ Lemadendye khyali irkye it, neke Adam, ma yala lim o salke sasam, dendye khyury ma Hula-

sokwe yukun irire mumu. Ode khyali Yesus Kristuske wasi ktela mlay ialake sasam dakun, mane irire mumu ne bisa ma mlay a sir ti Hulasokwe, ode rmorif nini nam.

¹⁹ Ode khyali irkye it, neke Adam, ti lema itomolu ode lema itoha nam Hulasokwe itanukke, dendye khyury ma iry ribunke raka wait lim o sal. Klala khyali irkye it dakun, neke Yesus Kristuske, ti itomolu ode itoha Hulasokwe ne, dendye iry ribunke ana mlay a sir ti Hulasokwe.

²⁰ Keskyede heitlulswo ti klelan Adam yor Yesuske desy, desike ne Hulasokwe yal wasi tnyetakke ti Musa, mamode irkye bisa ma hye toha lbweta ohe, wasi lim o sal ialanare ktyabal a ktyabal toha. Keskyede kyoat lim o sal neke ktyabal a ktyabal toha, desikeo Hulasokwe rala eras inal ti irkye ne ktyabal a ktyabal ma mausw dakun.

²¹ Lemadendye heitlulswoke lim o sal neke ksyukar ei nuske ktem ne ma khyareta irire mumu, dendye irire mumu ne musti mo rmaty. Keskyede selsel neke Hulasokwe syusu rala eras mausw ksyalikke ma ity de. Kali koldyesike mane Hulasokwe byohe, ity neke mlay a ity ti I, ode ana yal mormyorif manal nini namke ma ity, neke khyali ity Ebut Yesus Kristuske.

6

Kete tlura ma lim o sal khyareta ity tenatare de

¹ Waikw o hatnimakw e, Hulasokwe syos ity wait lim o sal ba de, khyali rala eraske. Koldyesikemo, anakyai irire dum a rrekan ode rtanuk ma rbohe, “Lemamo kyaki-kyaki ne tala lim o sal

bo, mamode Hulasokwe rala eras isusu ma ity desy ktyabal a ktyabal huruk.”

² Keskyede kete trekan koldyesy! Kali ity wait mormyorif mamunake kmyaty kyor Kristuske de, ma lim o sal ne lema khyareta ity de. Koldyesikemo, kete trekan ohe kyaki-kyaki ne bisa ma tmorif ti lim o sal.

³ Keskye mnyenas ohe, kyoat a rbabtis a e ma myety ral sasamke myor Yesus Kristuske, desikeo kola dene mmyaty myor Kristuske ma ramlin a e de.

⁴ Lemadendye kyoat a rbabtis a ity, desikeo kola dene tmaty, ode ramlin ity tor Kristuske, mamode ity neke tmorif huruk ma bisa ma tamin ti mormyorif harharkwe. Kola dene Kristuske Ama-na yal wasi haret lan lahukke, ma yala Kristuske ma myorif huruk toha matmyatkye.

⁵ Dendye kolnye ity neke tety ral sasamke tor Kristuske ti imaty o imorif huruk ne, koldyesy dakun o ana mlay bain o ity neke tmorif huruk, kola dene Kristuske imorif huruk dakun ne.

⁶ Kali ity neke the ohe, ity wait mormyorif mamuna nekre kmyaty kyor a Kristuske de, kola dene rabakw a ity wait mormyorif mamuna desy kyor Kristuske ti tul masanwalw ike ne. Ode nam desikre kdi ti, mamode lim o sal lema khyareta ity wait mormyorifke de, ode ity neke lema taka at ti lim o sal dakun de.

⁷ Kali kolnye esei desike myaty de, desikeo lim o sal ne lema khyareta i de.

⁸ Lemadendye kolnye ity neke tmaty tor Kristuske de, desikeo ttohak ohe, ity neke ana tmorif huruk ma tor I dakun.

⁹ Kali the ohe, kolnye Hulasokwe yala Kristuske ma myorif huruk toha mamatire, desikeo ana lema myaty de, dendye matmyatkye lema bisa ma khyareta I de.

¹⁰ Kali Kristuske myaty klatsam desy bo, mamode yaditi irkye toha haret lim o sal ti kihareta i ne, ti kiba knaru ne. Ode kyala kyosy sew a Kristuske imorif huruk ne ma ti kiba knaru ne, Kristuske myorif nini nam ma yala Hulasokwe ralake ma kimukmuka i.

¹¹ Lemadendye ei ne dakun o musti mo mryekan ohe, wasimy mormyorif mamunake kmyaty kyor a Kristuske de, neke lim o sal lema khyareta e de. Ode musti mo mryekan dakun ohe, wasimy mormyorif ne harharw, ti minety ral sasamke myor Yesus Kristuske ne, ma mmyorif ma myala Hulasokwe ralake ma kimukmuka i.

¹² Lemadendye kete mlyura ma lim o sal khyareta huruk ti tenamy ana kimaty ne, ma kete mtyoha wasimy dakdyakin atyat desikre de.

¹³ Dendye kete mlyura simamire, ta lwaumire, dete lemamo sai ta sai mamin ti tenamire, ma myal ma myala ktela atyatare. De musti mo myal tenamire mumu ba ti Hulasokwe, kali kola dene mmyaty de, keskyede selsel neke mmyorif huruk mane. Dendye musti mo myal nam mamin ti tenamire ne mumu ba ti Hulasokwe, mamode Hulasokwe yal e, ma yal ma yala ktela mlaire, ma ktyoha ibuke.

¹⁴ Lemade ei ne bisa ma myala koldyesy, kali lim o sal lema khyareta tenamire de. Kali mlay a e ti Hulasokwe ne, neke lema khyali mitoha tnyetak Musake ne, de khyali Hulasokwe rala

eraske khyareta e de.

Ity neke taka at ti Hulasokwe

¹⁵ Waikw o hatnimakw e, Hulasokwe byohe, ity neke iry mlay a ity, neke lema khyali tamorif mo tatoha tnyetak Musake ne, de khyali Hulasokwe rala eraske bo. Koldyesikemo, anakyai irire dum a rrekan ode rtanuk ma rbohe, “Hulasokwe syusu rala eraske ma ity de, dendye bisa ma tala lim o sal bo!” Lema koldyesy!

¹⁶ Kali mhye ohe kolnye myal tenamire ti irkye it, ma mtyomolu ode mtyoha i, desikeo mika at ti i ma desy. Koldyesy dakun o, kolnye myal tenamire ma myal ma mialala lim o sal, desikeo mika at ti lim o sal ma desy, kali lim o sal khyareta e de. Dendye lim o sal desike ana kyor a e ei matmyaty manal nini namke. Klala kolnye myal tenamire ti Hulasokwe ma mtyomolu ode mtyoha I, desikeo mika at ti Hulasokwe ma desy. Dendye ei neke mmyorif ti mormyorif a mlakye.

¹⁷ Lemade kswalak eraske ba ti Hulasokwe! Kali biar ma kyalake lim o sal khyareta e, ma mika at ti lim o sal ma desy, keskyede selsel ne myal ralamy kusunare ma mtyomolu ode mtyoha nam a mlay irire raajar ti e nekre de.

¹⁸ Ode Hulasokwe yaditi e toha haret lim o salke de, ode selsel ne mika at ti Hulasokwe, ma mtyoha ma myala nam a mlaire.

¹⁹ Ktwanuk inahliakke ti atke koldyesy, kali ei neke iry a e bo, ode lema mhye mamak nam kutanuk nekre kbuanare. Kali kyalake ei neke myal nam mamin ti tenamire ne, ti wasimy dakdyakin atyatare ma khyareta e, dendye ktyabal ma myala

lim o sal. Keskye senweke ei neke musti mo myal tenamire ma mika at ti Hulasokwe, ma mtyoha nam a mlaire, dendye wasimy mormyorifare ana nelnyely ma ktyabal a ktyabal toha.

²⁰ Kyoat mika at ti lim o sal a nggora, desikeo lema mhyaduli ma mtyoha nam a mlaire.

²¹ Dendye mitot nam eras sai toha wasimy mormyorif desy de? Nam desikre mumu ne khyury a e ma senweke mmyay, ode kyor a e ei matmyaty manal nini namke dakun.

²² Keskyede senweke Hulasokwe yaditi e toha lim o sal, ma lim o sal desike lema khyareta e de. Ode mika at ti Hulasokwe de. Dendye mitot eraske lan a ksyalik, neke Hulasokwe yala e ma nelnyely a e. Mane ana mitot mormyorif manal nini namke.

²³ Klala iry maala lim o salke ana itot kolyanke. Ode kolyan desike matmyaty manal nini namke. Keskyede ti iry a inety ral sasamke yor ity Ebut Yesus Kristuske ne, Hulasokwe yal mormyorif manal nini namke ti i, neke kyosy Hulasokwe rala eraske bo. Dendye eras Hulasokwe inal ti i desike, lema kolyanke desy, de hadiake ti i ma desy.

7

Tnyetak Musake lema kyety eta ity de

¹ Waikw o hatnimakw matohak e! Ei neke mhye tnyetak kihareta irkye ne de. Dendye musti mo mhye dakun nam kutanuk ne, neke: tnyetakare cuma mo khyareta irkye, ti kyoat a imorif a nggora ne.

² Kola ne wamfwetke it ma isa de, ma lai-na myorif a nggora, desikeo tnyetak insake kyety eta

wamfwet desy yor lai. Keskyede kolnye lai-na myaty de, desikeo tnyetak maety eta wamfwet desy inor lai ne, lema bisa ma kyety eta wamfwet desy de.

³ Dendye kolnye wamfwet desike lai-na myorif a nggora, keskye isaa yor wamwany salik, desikeo wamfwet desike yaldotw ma desy. Keskye kolnye lai-na myaty de, desikeo lema kika tnyetak maety eta wamfwet desy de. Dendye kolnye wamfwet desike byuma isa huruk, desikeo lema nam.

⁴ Waikw o hatnimakw e! Ktela maoly desike kdi ti e dakun, kali mmyaty myor Kristuske ti tul masanwalw ike de, dendye tnyetak Musake lema kyety eta e de. Koldyesikemo ei neke myety ral sasamke myor Kristuske de. I neke Iry a Hulasokwe iala I ma imorif huruk toha matmy-atkye ne. Ode myety ral sasamke myor Kristuske, mamode bisa ma myala ktela erasare, ma wasimy mormyorifare kyala Hulasokwe ralake ma kimukmuka i.

⁵ Kali kyalake tamorif ne tdakin ma ttoha ity wait dakdyakin atyatare a nggora. Ode biar ma tnyetak Musake kbyu eta ity, keskye kibu eta ity neke khyury ma ity wait dakdyakin atyat desikre kkyarya ti ity tenatare, ma tbuma taalala lim o sal ma ktyabal a ktyabal toha, ma desike ne kinor a ity ei matmyaty manal nini namke ne.

⁶ Keskyede selsel ne Hulasokwe yaditi ity toha tnyetak Musake de, kali kola dene tmaty de, dendye tnyetak Musake lema kyety eta ity de. Lemadendye selsel neke tkarya ti Hulasokwe, neke lema kyor mormyorif mamuna a tnyetak Musake kihareta ity desy. De tkarya ti Hulasokwe

kyor ity wait mormyorif harharw a Hulasokwe Memeanke kihareta ne.

Tnyetak Musake ksyusu irkye wasi lim o sal

⁷ Waikw o hatnimakw e, kolnye tnyetak Musa neke, ne kihury ma tala lim o sal ma ktyabal a ktyabal toha ne, desikeo anakyai irire dum rrekan ode rtanuk ma rbohe, “Tnyetak Musake atyat!” Keskyede kete trekan koldyesy! De khyali tnyetak Musake, mane bisa ma the bain-bain ohe, nam sai ne lim o sal ne. Kali kolnye tnyetak Musake lema ktyanuk ohe, “Kete mmwaboka irire wait nam,”* desikeo ana yaw ne lema khwe ohe, wasikw dakdyakin maoly desike neke lim o salke desy.

⁸ Keskye kyoat khwe tnyetak desy, desikeo lim o sal kyal klelan desike ma kkyarya ti ralakkwe kralake. Mane khyury ma wasikw dakdyakin atyat desike ktyabal a ktyabal toha. Keskye kolnye tnyetak Musake lema kimin ma ksyusu wasikw lim o sal, desikemo lim o sal ne lema khyareta kyal ralakkwe kralake.

⁹ Kola lenla khwe tnyetak Musake, desikeo krwekan o kumorif ne lema kala lim o sal. Keskyede kyoat a khwe tnyetak Musa desy, ma tnyetak desike kbyu eta yaw, desikeo lim o sal neke nenmo khyareta kyal ralakkwe kralake.

¹⁰ Lemade khwe toha lbwetakw ohe, soso yaw toha Hulasokwe, ode musti mo kmwaty. Dendye ohe tnyetak Musa ne kyor yaw ei mormyorif manal nini namke, kyosy desy ma o tnyetak desike kyor yaw ei matmyaty manal nini namke.

* **7:7 7:7** Matos ti Kel. 20:17.

¹¹ Desike ne lim o sal kyal klelan desy, ma kyal tnyetak Musake, ma kyal ma kikakmet a yaw, mane kitabahunw a yaw ne.

¹² Lemadendye tnyetak Musake, ktyabal a nam mamin ti tnyetak desike kralake mumu ne, neke nelnyely, ode mlay, ode eras, kali kyosy a Hula-sokwe.

¹³ Dendye anakyai mryekan ohe, tnyetak eraske ne kinor yaw ei matmyaty manal nini namke ne e? Lema koldyesy! Kali kyosy tnyetak eras desike, dendye khwe toha lbwetakw ohe, lim o sal kkyarya ti ralakkwe kralake, mane kinor yaw ei matmyaty manal nini namke ne. Ode kyosy a tnyetak eras desy, dendye bisa ma khwe ohe, lim o sal neke kihawt ksyalik.

Kolnye lema Yesuske desyo irkye lema yala yal ma yala ktela erasare

¹⁴ Dendye waikw o hatnimakw e, ity neke the ohe, tnyetak Musa ne eras kali kyosy Hula-sokwe Memeanke, keskye yaw neke iry a yaw bo. Dendye lim o sal neke khyareta yaw, kola dene kuka at ti lim o sal ma desy.

¹⁵ Kali yaw neke lema krwekan a khwe o ktela sakar ne kual ne! Kali ktela eras kudakin ma kwalanare, desyo lema kala. Klala ktela atyat kumnisikare, desike ne kual ne.

¹⁶ Dendye kolnye kala ktela lema kudakin desikre, neke kbuanke o, yaw neke kou ohe, tnyetak Musake eras.

¹⁷ Lemadendye kala ktela atyat desikre, biar ma lema kdwakin, kali lim o sal mamin ralakkwe

krala ne, neke ne kihury ma kuala ktela atyat desikre ne.

¹⁸ Ode khwe ohe, lema kika nam eraske it elik, ti tenakw a irkye ne bo. Kali kdwakin ma kala ktela erasare, keskyede lema kala kal ma kala.

¹⁹ Kali ktela eras kudakin ma kualanare, desyo lema kala. Klala ktela atyat lema kudakinare, desike ne kuala ne.

²⁰ Dendye kolnye kala ktela lema kudakinare, desyo yaw ne lema kala, de lim o sal mamin ti ralakkwe krala ne, neke ne kiala ne.

²¹ Lemadendye khwe ohe, nam desikre mumu ne kyalamo kdi ti ti tenakw ne, neke biar ma kdwakin ma kala ktela erasare, keskyede wasikw dakdyakin atyatare kimin ma kbya eta dakun.

²² Kali ti ralakkwe krala neke, kimukmuka i ti Hulasokwe wasi tnyetakare,

²³ keskye lema ktwoha Hulasokwe wasi tnyetak desikre, kali haret lim o sal mamin ti tenakw neke ne khyareta yaw. Ode ti ralakkwe krala ne, desyo kdwakin ma ktwoha Hulasokwe wasi tnyetakare, keskye ti tenakw ne, desyo haret lim o sal ne kimin ti, ma ksyorw a Hulasokwe wasi tnyetak desikre. Mane haret lim o sal desike kyety eta yaw, ma khyareta tenakkwe mane kuka at ti lim o sal.

²⁴ Edo! Ksunw ksyalik! Lema keti kal de! Esei ne ana iaditi yaw toha tenakw a kibuma kinor yaw ei matmyaty a manal nini namke ne de?

²⁵ Kali ti ralakkwe krala neke, kdwakin ma ktwoha Hulasokwe wasi tnyetakare, keskye haret lim o sal mamin ti tenakw neke khyareta yaw ma ktwoha lim o sal desikre.

Keskye kswalak eraske ba ti Hulasokwe! Kali

Hulasokwe yal wasi haretke ma yaditi yaw toha lim o sal a mahareta tenakkwe ne, ma yaorif yaw toha matmyatkye, khyali nam ity Ebut Yesus Kristuske ialake.

8

Hulasokwe Memeanke khyareta ity ralat a kralanare ma tamorif ne bisa ma ttoha Hulasokwe ibuke

¹ Lemadendye waikw o hatnimakw e! Kyala kyosy sew a Kristuske imaty desy ma ti kiba knaru ne, lema kika ukun a matmyaty manal nini namke de, ti iry a ranety ral sasamke ranor a Yesus Kristuske ne.

² Kali kyosy Yesus Kristuske, desikeo Hulasokwe Memeanke wasi haretke kyety mormyorifke ma ity, ode kyaditi ity toha haret lim o sal a manety matmyaty manal nini namke ne.

³ Kali tnyetak Musake lema bisa ma kyaditi ity toha ity wait lim o sal, kali ity neke lema malkyakaw ity ma bisa ma ttoha tnyetak Musake mumu. Keskye Hulasokwe I ne iaditi ity toha ity wait lim o sal nekre de. Neke kolnye: Hulasokwe yaso Ananke ma myai nuske ktem ne, ma myaty ma lyitan eta ity, ma syos ity wait lim o sal ba. Kyoat desike Ananke mya o yola irkye. Ode tenanke kola ity tenat a kiala lim o sal ne, keskye I neke lema yala lim o salke it elik. Hulasokwe yala koldyesy ma Ananke yeluk ity, mamode Hulasokwe lema yukun ity, khyali ity wait lim o sal, de yukun Ananke.

⁴ Hulasokwe yala koldyesy, mamode ity neke bisa ma mlay a ity ti Hulasokwe, ma ktyoha Hulasokwe wasi tnyetak a rakesy ti tnyetak Musake ne. Neke tamorif kyaki-kyaki ne, lema ttoha ity wait dakdyakin atyat mamin ti ity ralat a krala nekre de, de tamorif ne ttoha nam Hulasokwe Memeanke kibuke.

⁵ Kali iry a ramorif mo rtoha wait dakdyakin atyat mamin ti ralat a kralanare ne, neke rrekan nam atyat desikre bo. Klala iry a ramorif mo rtoha Hulasokwe Memeanke kibuare, neke kyaki-kyaki ne rrekan ti nam eras Hulasokwe Memeanke kibu desikre bo.

⁶ Dendye iry a rarekan ti wait dakdyakin atyatare ne, iry desikre ramorif ne rtoha nam atyat desikre bo, desyo ana rmaty, ma rei matmyaty manal nini namke. Klala iry a rarekan ti nam Hulasokwe Memeanke kibuke, iry desikre ramorif ne rtoha nam eras desikre bo, desyo ralat a kralanare kele rteka de, ode ana rmorif nini nam.

⁷ Kali iry a rarekan ti wait dakdyakin atyatare ne, iry desikre rsorw a Hulasokwe. Iry a maoly desikre sir ne lema rbuma rtoha tnyetak Hulasokwe, ode lema bisa ma rlakut a rtoha tnyetak desy dakun.

⁸ Kali iry a ramorif mo ratoha wait dakdyakin atyatare ne, iry desikre lema bisa ma rala Hulasokwe ralake ma kimukmuka i.

⁹ Keskye waikw o hatnimakw e, ei ne wasimy dakdyakin atyatare lema khyareta e de, de Hulasokwe Memeanke khyareta wasimy mormyorifare de, kali Hulasokwe Memeanke kimin ti ralamy kralanare. Keskye kolnye esei desike Kris-

tuske Memeanke lema kimin ti ralake kralake, iry desike Kristuske lema wasi iry a i.

¹⁰ Keskye kolnye Kristuske imin ti ralamy kralanare, biar ma tenamire ana kmyaty khyali lim o sal, keskye Hulasokwe Memeanke kyal mormyorif manal nini namke ti e, kali Hulasokwe byohe, ei neke iry mlay a e ti I de.

¹¹ Ode Hulasokwe Memean a kiala Yesus Kristuske ma imorif huruk toha mamatire ne, neke kimin ti ralamy kralanare. Dendye ana Hulasokwe yal Memean mamin ti ralamy krala desikre, ma yal ma yala tenamy a kimaty nekrekun ma kmyorif huruk.

¹² Lemadendye waikw o hatnimakw e, ity wait harharke ma tamorif ne musti mo ttoha Hulasokwe Memeanke kibuke, de lema ity wait harharke ma musti mo ttoha ity wait dakdyakin atyatare.

¹³ Dendye mnyenas, kali kolnye mimorif ne mtyoha wasimy dakdyakin atyat desikre, desikemo ana mmyaty. Keskye kolnye mlyura ma Hulasokwe Memeanke ksyalik e, ma mtyunik wasimy ktela atyat midakin o miala desikre ba, desikemo ana mmyorif nini nam.

¹⁴ Kali iry a Hulasokwe Memeanke kihareta sir ne, iry desikre Hulasokwe anan a sir.

¹⁵ Kali Hulasokwe Memean a inal ti e ne, neke lema kyala e ma mimtaut kola atare, ti ramtaut wait amam lanare ne. De Hulasokwe yal Memeanke ti e, ma kyala e ma ei neke anan a e. Ode khyali Hulasokwe Memean a mamin ti ity ralat a kralanare ne, mane ity neke bisa ma tal ity

ralat a kusunare ma tabuk Hulasokwe o, “Amo.”

¹⁶ Ode Hulasokwe Memean desike ne kkyarya ti ity ralat a kralanare, ma ktyanuk ma ity ma the ohe, ity neke Hulasokwe anan a ity.

¹⁷ Ode kali ity neke Hulasokwe anan a ity de, dendye ana tsaa ity ti nam eras Hulasokwe ihate-tak ma isosan kita ananare ne. Hulasokwe yal eras isosan desy ti Anan Yesuske de, ode ana yal ma ity dakun. Ode the ohe nam nekre mlay, kali kolnye masunkwe kdyan ity ti nuske ktem ne kola ne kidan Kristuske ne, desikeo ana tmorif tor a I ti wasi madelafke dakun.

Hulasokwe anan a ity ne ana tmorif ti wasi madelafke

¹⁸ Waikw o hatnimakw e! Hulasokwe wasi madelaf ana inal ma ity ne lan ma kbyilak de kbyilak masunw madan ity ti selsel ne. Dendye khwe ohe, masunw madan ity ti selsel ne, kolnye tran a kyor ana tamorif ti Hulasokwe wasi madelaf ana inal ma ity ne, desikemo masunw madan ity ti selsel neke mran a mran ma ity bo.

¹⁹ Kali nam ribun Hulasokwe iala ti lait o lasmyerke khaha ne, neke kmyaboka ksyalik ma kikita sew a Hulasokwe ana syusu ohe, anan esei.

²⁰ Nam ribun desikre kmyaboka ksyalik ma kikita sew desy, kali heitlulswo Hulasokwe syusno syoba nam ribun iala ti lait o lasmyerke khaha ne, ma lema bisa ma klyakut a ktyoha ktela Hulasokwe ireky a kmunake. De kyaki-kyaki ne kmyaty ode kibtasy bo, ma lema ktyoha nam ribun mamin ti lait o lasmyerke khaha ne kibuke,

de ktyoha Hulasokwe ibuke bo. Mamode nam iala desikre mumu ne kikita elik,

²¹ ma ana kyait sekwe, desyo yaditi nam ribun iala ti lait o lasmyerke khaha ne toha matmyatkye ma kete kibtasy, mamode matmyatkye lema bisa ma khyareta nam desikre de. Hulasokwe yala koldyesy, mamode bisa ma yal mormyorif eras lanke ti nam mamin ti lait o lasmyerke khaha ne, neke mais kola mormyorif eras lan ana inal ti ananare ne.

²² Kali ity neke the ohe, kyala kyosy heitlulswo ma ti kyait senwe, nam ribun Hulasokwe iala ti lait o lasmyerke khaha ne mumu neke kiktemtem ne kyarwen, kali kiktemtem ne kkyoman ma-sunkwe, kola ne wamfwetke ti kyoat idur hah o ikoman a ksunsunuke ne.

²³ Ode nam ribun mamin ti lait o lasmyerke khaha neke, lema kmyesan a kkyoman ma-sunkwe ma kyarwen bo, de ity neke dakun o tarwen ti ity ralat a kralanare dakun. Hulasokwe yal Memeanke ma ity de, kola dene tanosy hadiake kmuna ne, keskye Memean desy dakun o kyeluk nyatos ohe, ana tosy a madelaf Hulasokwe inal ma ity ne. Ode biar ma koldyesy, keskyede selsel ne tarwen dakun, kali tmaboka ksyalik, ma malmata takita sew desy, ti ana Hulasokwe mya ma byitil ity ma anan a ity ne. Ode ana yaditi ity tenatare toha masunw madan ity desy ti nuske ktem ne, ode ana yeluk ma yal ity tenat harharw a lema bisa ma kimaty ne ma ity.

²⁴ Kali biar ma Hulasokwe yaorif a ity de, keskyede ity neke tmea ti Hulasokwe a nggora, ma

takita nam eras ana inal ma ity ne. Kali kolnye tatot nam eras ana inal ma ity ne de, desikemo lema takita nam eras desy de. Kali nam irkye itotke de, desikeo lema ikita nam desy huruk de.

²⁵ Keskyede kolnye lenla tatot nam ana inal ma ity desikre, desikeo musti mo talkyaw ity ralat a kralanare manenen ma takita bo.

²⁶ Ode kyoat lema teti tal de, desikeo Hulasokwe Memeanke dakun o ksyaluk ity. Neke kolnye tsambayan, keskye lema the ohe, tasambayan ne musti mo ttanuk sai ti Hulasokwe, desikeo ana Hulasokwe Memeanke kmyesan a kyeluk ity, ma ksyambayan ti Hulasokwe, kyor tun maba demdemure, ma irkye lema bisa ma yal ma itunak.

²⁷ Ode Hulasokwe hye ity ralat a kralanare, ode hye nam Memeanke kisambayanke wasi kbuanke dakun. Kali Hulasokwe Memeanke ksyambayan ma ktyoha Hulasokwe ibuke, ma ksyaluk Hulasokwe wasi irire.

Hulasokwe yal sai ta sai ma kyala ma kyety eraske ma ity

²⁸ Ode the ohe nam eras o atyat sai ta sai bo ma kidi ti ma ity ne, neke nam desikre mumu ne Hulasokwe yal ma yala ma kyety eraske ma ity. Hulasokwe yala koldyesy ti iry a manal ralat a kralanare ti I ne, neke iry a iilik ma ratoha wasi rekryekkye ne.

²⁹ Kali heitlulswo Hulasokwe yohut a kmuna de, ma iry a iilik desikre ana rola Ananke. Mamode Ananke ausw a I ti wainare, neke ti iry matohak a ity ne mumu.

³⁰ Ode iry a Hulasokwe iohut a kmuna ma rola Ananke desy, neke yabuk sir ma wasi iry a sir de.

Ode iry a iabuk sir desikre, neke byohe mlay a sir de. Ode iry a ibohe mlay a sir desikre, neke yal sir ma ror I ti wasi madelafke dakun de.

Lema namke it bisa ma kisali ity toha Hulasokwe wasi loblobakke

³¹ Lemadendye waikw o hatnimakw e, kolnye tnenas nam Hulasokwe iala ma ity desikre mumu, desikeo the bain ohe, lema irkye it a bisa ma yala yal ity, kali Hulasokwe I ne inonor a ity ne bo.

³² Ode the ohe ktela desy mlay, kali Hulasokwe lema ineti Anan sasasam ne, de yal Anan sasasam ne ba ti irire ma rtabahunw a I, mamode I neke bisa ma lyitan eta ity mumu. Ode kolnye yal Ananke khyali ity de, desikeo the elik ohe, kyosy a Hulasokwe rala eras desy, dendye ana yal eras sai ta sai ma ity dakun bo.

³³ Ode ity neke Hulasokwe yilik ity de, dendye lema irkye it a bisa ma yoit salke ma ity, kali Hulasokwe I ne iohut ohe, iry a ilik desikre mlay a sir de.

³⁴ Ode lema irkye it a bisa ma yukun ity, kali Yesus Kristuske myaty ma lyitan eta ity. Ode lema desike kmyesan bo, de myorif huruk toha mamatire dakun, ma tyaklulw ti Hulasokwe seri wanke,* ode I ne byaa klen ma ity tor Hulasokwe.

³⁵ Lemadendye lema irkye it a bisa ma isali ity toha Kristuske wasi loblobakke ma ity ne. Biar ma masunkwe kdyan ity, dete lemamo tamin ti masekanke, ta roban de rtaba ity, dete lemamo lu o laar, ta biar ma tamleh, dete lemamo masunkwe

* **8:34 8:34** Tunke khatu kibohe, *seri wanke*, neke kbuanke o *wen manety alanke ode haret lan lahukke kimin ti*.

kdyan ity ma nenma tmaty, ta rtabahunw a ity dakun, keskye nam desikre mumu ne, lema bisa ma kisali ity toha Kristuske wasi loblobakke ma ity ne.

³⁶ Kola ne rakesy ti Kitab Lanke ma kbyohe,

“O Hulasow O, khyali aramy mitohak ti O ne,
dendye sew kyaki nekre irire robak ma
rtabahunw aramy.
Iry desikre rala aramy kola dene dombake ne,
ma rala ma rkotal telake.”

³⁷ Biar ma ktela desikre mumu ne kdi ti ma ity, keskye ktela desikre lema bisa ma kyala ity ma ttourbana,[†] de ity neke bisa ma tala tal ktela desikre mumu ma kbyilak de kbyilak, khyali Kristus malobak ity ne wasi haretke ne kisaluk ity ne.

³⁸ Ktwanuk koldyesy, kali ktwohak ohe lema namke it a bisa ma kisali ity toha Hulasokwe wasi loblobakke. Biar ma tmaty ta tmorif, dete lemamo nyaso manosy laitare, ta haret ngkeskwaure, dete lemamo ktela madi ti ity ti selsel ne, ta ti sew ana mama nekre, dete lemamo maharetanare,

³⁹ neke haret salik mamin ti laitke, ta haret salik mamin ti lasmyerke krala ne, ode nam salik Hulasokwe iala nekre mumu dakun, nam desikre mumu neke, lema bisa ma kisali ity toha Hulasokwe wasi loblobakke, neke khyali ity Ebut Yesus Kristuske.

8:36 8:36 Mzm. 44:23 [†] **8:37 8:37** Tunke khatu kibohe, *ttourbana*, neke ti tel mabuske kbyohe, *kita mundur*.

9

Paulus ralake kitol kali iry Yahudi-nare lema rbuma rtohak ti Yesuske

¹ Waikw o hatnimakw e! Nam ana kutanuk ne mlay, de lema kukakmet, kali kety ral sasamke kor Kristuske de, ode ralakkwe kralake ktyanuk ohe, lema kukakmet, kali Hulasokwe Memeanke kkyarya ti ralakkwe ma khwe ohe nam kutanuk ne mlay.

² Lemade ktwanuk ti e ohe, ralakkwe kitol a ksyalik, ode sewah o msarin neke masunkwe kdyan yaw, ma kyala ralakkwe kralake ma kisalsal,

³ khyali wasikw bangsake, neke waikw o hatnimakw Yahudi a lema rabuma ratohak ti Kristuske ne. Dendye kuten ma lemamo Hulasokwe yukun yaw ma kyeluk sir, ma yala yaw ma soso yaw toha Kristuske, kolnye ktela desy bisa ma ksyaluk sir ma rtohak ti Kristuske.

⁴ Kali sir desike iry Israel a sir. Ode Hulasokwe lyeik sir ma anan a sir de, ode syusu wasi made-lafke ti sir de. Ode ihatetak yor sir kdi a klai ne de, ode yal tnyetak Musake ti sir de. Ode syusu ksala kabei ne ti sir de, ti rasambayan ode raou ti I ne, ode yal wasi hatetakare ribun ti sir dakun de.

⁵ Ode sir desike Abraham, Ishak, ode Yakub tesnwo natut sir. Ode kbyilak ti desy dakun o, Iry a Hulasokwe isusu ma ika Raja ode iaorif irkye ne dakun o iry Israel a I, neke Yesus Kristuske, ti kyoat radur hahak I kola irkye ne. I neke Hulasow a I, ma hyareta nam mamin ti lait o lasmyerke

khaha ne mumu, dendye byer o tyahal ma tleru I nini nam. Amin.

Hulasokwe yilik irire ma ktyoha ibuke ma wasi iry a sir

⁶ Biar ma iry Yahudi-nare ribun a lema rbuma rtohak ti Kristuske, keskyede kete mryekan o, Hulasokwe hyasana wasi hatetak a ihatetak inor iry a Israel-are ne. Kali Hulasokwe lema yilik iry Israel-are mumu ma wasi iry a sir, de cuma mo yilik dum bo.

⁷ Ode koldyesy dakun o, Hulasokwe lema yilik Abraham tesnwo natu desikre mumu ne, ma yaki sir ti Abraham ananare. De cuma mo yilik Ishak yor tesnwo natu bo, kali Hulasokwe ihatetak ti Abraham de, ma byohe, “Cuma mo Ishak tesnwo natu ne, neke kaki sir ti anamure.”

⁸ Neke kbuanke o, Hulasokwe lema yilik Abraham tesnwo natunare mumu ma anan a sir, de yilik naman a radur i ma ktyoha Hulasokwe wasi hatetakke, neke Hulasokwe yohut ohe, ananare sir desy.

⁹ Kali Hulasokwe ihatetak ti Abraham ma byohe, “Ana ain mama ne kulak Yaw, kyoat desy dakun o Sara idur hah de ma ananke wamwany a i.”

¹⁰ Ode lema desike kmyesan bo, de bisa ma tseak ti Ribka dakun. Ribka neke yor tenanke, ma idur hah bonyo ananke lakdu, ma deruke wamwany sir, neke Esau yor Yakub, ma amat sasamke, neke ani a Ishak ma ity ebnwo matrumat i.

11-12 Keskye kyoat Ribka lenla idur hahak naman deru desy, desikeo Hulasokwe tyanuk ti Ribka ma byohe, “Anamw auskwe ana ika at ti anamw amurkye.”

Dendye biar ma naman deru desike lenla radur ti sir ma lenla rala ktela eras o atyat, keskye Hulasokwe yohut ma yilik naman ibuke de. Hulasokwe yala koldyesy ma ksyusu ohe, kolnye yilik irkye neke lema yatos ti ktela raalanare, de yilik sir ma ktyoha wasi rekryeky desy bo.

13 Kola dene rkesy ti Kitab Lanke ma Hulasokwe byohe, “Yaw ne kswusu ralakw eraske ti Yakub, klala Esau lema.”*

14 Kolnye Hulasokwe yilik irire koldyesy, desikemo ana ttanuk kolkya? Hulasokwe ialake lema mlay e? Keskye lema koldyesy!

15 Kali Hulasokwe tyanuk ti Musa de, ma byohe,

“Kolnye kbwuma kswusu wasikw loblobakke ti esei desy, desikemo kswusu ti i bo. Ode kolnye kbwuma kswusu ralakw eraske ti esei desy, desikemo kswusu ti i bo.”

16 Lemadendye Hulasokwe ilik irkye ne, neke lema ktyoha irkye ibuke, ta lema ktyoha irkye wasi ktela ialanare, de ktyoha Hulasokwe rala eraske bo.

9:11-12 9:11-12 Kej. 25:23 9:13 9:13 Mal. 1:2-3 * 9:13 9:13 Ti ayat ne kbyohe, *Yaw ne kswusu ralakw eraske ti Yakub, klala Esau lema.* Klala ti tel Yunanike desikeo kbyohe, *Yaw ne klwobak Yakub, klala kumnisik Esau.* 9:15 9:15 Kel. 33:19

¹⁷ Kali rkesy ti Kitab Lanke kralake de, neke Hulasokwe tyanuk ti Firaun raja Mesirke ma byohe, “Kbwitil o ma muka raja, mamode kswusu wasikw haret malkyakakwe ti oa mor irire mumu ti Mesir, ma mhye ohe kala kal o, ma ana Anikkwe kimmelir ti nuske ktem ne mumu, ma irire rleru Anikkwe.”

¹⁸ Dendye kolnye Hulasokwe byuma syusu rala eraske ti esei desy, desikemo syusu ti i bo. Ode kolnye byuma yala irire ma ralatare ngkora ma ktyoha ibuke, desikemo yala bo.

¹⁹ Dendye kolnye Hulasokwe yala koldyesy, desikeo anakyai ti ei neke, dum a mtyanuk ma mbyohe, “Koldyesikemo kyanmwane Hulasokwe yukun irkye, khyali ralake ngkora ma lema byuma itomolu Hulasokwe ne de? Ode esei ne malkyakaw i ma bya etno eta Hulasokwe ti nam ibuare ne de?”

²⁰ Keskye lema bisa ma mtyanuk koldyesy. Ei neke iry a e bo. Ode irkye lema bisa ma tyanuk ti Hulasokwe ohe, Hulasokwe sal a I. Kola dene lkusy a irire raala toha rayahkwe ne, ma lkusy desike lema bisa ma kyena iry maala lkusy desike ma kbyohe, “Kyanmwane mala yaw kolnye ne de?”

²¹ Iry a maala lkuskye, bisa ma yala sai ta sai toha rayahkwe, ma ktyoha ibuke. Ode kyosy a rayahkwe khatu sasam desy, bisa ma yal ma yala lkuskye enaru, neke yala it ma eras a ksyalik, ma kyalamo rpake ti kalkalare, klala yala it dakun ma knyor bo, ma kyalamo rpake ti sew kyaki nekre.

²² Koldyesy dakun ti nam Hulasokwe iala ma ktyoha ibuare ne. Hulasokwe byuma syusu keyerake ti iry maala lim o sal nekre, ode byuma syusu ohe I neke haretke kimin a I ma yukun iry desikre. Keskyede Hulasow neke lema samfurw o syusu keyerake ti iry mahury ma ikeyer desy, de ineti ralake, ma ikita ma ana syusu keyera desy, ti kyoat yukun iry a iohut ma ana rabai mamaty rala desikre.

²³ Ode Hulasokwe ana yukun iry maoly desikre koldyesy, ma syusu ti iry a ilobakare ma rhe ohe, wasi eraske ti iry a ilobakare ne lan a ksyalik ode lema kimres elik. Iry a ilobak desikre heitlulswo yilik sir de, ma ana rmorif ti wen sra eraske, ma ror I ti wasi madelafke ti kiba knaru ne.

²⁴ Ode iry a Hulasokwe iabuk sir ma ror I ti wasi madelafke ti kiba knaru ne, neke ity ne. Ode iry a iabuk desikre, neke lema iry Yahudi-nare rmesan bo, de dum a rosy iry a lema Yahudi-nare dakun.

²⁵ Ktela Hulasokwe iala desike kola ne Hulasokwe itanuk ti Hosea iry manety Hulasokwe wasi nyanoke, ma ikesy ti wasi kitabke khyali iry a lema Yahudi-nare ne ma kbyohe,

“Iry a lenla wasikw iry a sir ne, ana khwaly a sir o,
‘Wasikw iry a sir.’

Ode iry a lema kusus wasikw loblobakke ti sir ne, ana kswusu wasikw loblobakke ti sir dakun.”

²⁶ “Ode ti wen kabei bo, ma kola Hulasokwe tyanuk ti iry mamin tiare ma byohe, ‘Ei neke lema wasikw iry a e,’

neke ti wen desikre dakun o, ana Hulasokwe tyanuk ti iry desikre huruk ma byohe, 'Ei neke, Hulasow mamorif nini nam a Yaw ne, anakw a e.' ”

²⁷ Ode Yesaya iry manety Hulasokwe wasi nyanoke yatela ti khyali iry a Israel-are ohe,

“Biar ma iry a Israel-are ribun sir ma rola ne laran mamin ti namwatake, keskyede ana Hulasokwe cuma mo yaorif dum bo.

²⁸ Kali ity Ebut Hulasokwe yohut elik ohe, ana lema soso bonyo ana yukun tun ti irire mumu ti nuske ktem ne, ma ktyoha nam a mlay iohutke.”

²⁹ Ode kola dene Yesaya tyanuk huruk ma byohe,

“Kolnye ity Ebut Hulasow a Mahareta Lan Lahukke, lema lyura ity tesnwo natut nekre dum ma rморif, desikemo iry a Yahudi ity neke ity teit dakun, kola ne iry mamin ti Sodom o Gomorake, ti kyoat heitlulswo Hulasokwe syoly o syarah sir ba ma teit ne.”

Iry Yahudi-nare lema ratot ksala ma mlay a sir ti Hulasokwe, klala iry a lema Yahudi-nare ratot ksala ma mlay a sir ti Hulasokwe

³⁰ Lemadendye waikw o hatnimakw e, nam kutanuk desy kbuanke kolnye: Biar ma iry a lema

Yahudi-nare lema ralkyaw sir ma robak a ksala ma mlay a sir ti Hulasokwe, keskyede ratot ksala desy. Ksala desike ne Hulasokwe byohe mlay a sir, kali rtohak ti Kristuske.

³¹ Klala biar ma iry a Yahudi-nare ralkyaw sir ma robak a ksala ti tnyetak Musake ma bisa ma kyala sir ma mlay a sir ti Hulasokwe, keskyede lema ratot a ksala ti tnyetak desy.

³² Ode kyanmwane lema ratot a ksala ma bisa ma kiala sir ma mlay a sir ti Hulasokwe ne de? Kali lema rtohak ti Kristuske, de rtohak ti ktela ratoha tnyetak Musake ne. Kali rrekan o wait ktela desikre bisa ma kyala sir ma mlay a sir ti Hulasokwe. Dendye rola dene iry a matunas hatkwe ma ilily ne, kali lema rbuma rtohak ti Kristuske.

³³ Kola ne rkesy Hulasokwe tunanare ti Kitab Lanke ti khyali hatw desy ma kbyohe,

“Mtyomolu mamak! Ktwutuk Rajake ti Sion,[†]
neke yola dene hatw a kihury ma irire ratunas ne.

Keskyede esei desike tyohak ti Hatw desy, desikeo ana lema ralake kakan de.”

10

¹ Waikw o hatnimakw matohak e! Ralakkwe krala ne kdyakin a ksyalik ma Hulasokwe yaorif wasikw irire, neke iry a Yahudi-nare, dendye kal ralakkwe kralake ma kswambayan ti sir.

² Kali yaw neke khwe ohe nam kutanuk ne mlay, neke: Wasikw bangsake randil ma rtoha

[†] **9:33 9:33** Ti ayat ne kbyohe, *ti Sion*. Any a Sion neke ksyusu nus lan Yerusalemke. **9:33 9:33** Yes. 28:16; 8:14

Hulasokwe, keskye sir neke lema rhe bain-bain ohe, ratoha Hulasokwe ne ksalake kolkyahei.

³ Ode sir dakun o lema rbuma rhe ksala Hulasokwe iala irire ma mlay a sir ti I ne, de rbuma rtoha wait ksala ratoha tnyetak Musake ne, kali rrekan o ksala desike ne kiala sir ma mlay a sir ti Hulasokwe ne. Dendye ktela desike ne kihury ma lema rou Hulasokwe wasi ksala kiala sir ma mlay a sir ti I ne.

⁴ Keskye the ohe irire lema bisa ma mlay a sir ti Hulasokwe, kolnye rtoha tnyetak Musake. Kali Kristuske mya de, ma yal ksala harharkwe ti irkye de. Ode khyali ksala harharw desy, mane Hulasokwe yala irire mumu ma mlay a sir ti I, kolnye rtohak ti Kristuske.

Hulasokwe yaorif esei ta esei ti ratohak ti Kristuske ne

⁵ Ode Musa kyesy a ksala irkye mlay a i ti Hulasokwe ne, ti khyali ratoha tnyetak Musake ne ohe, “Esei desike imorif ne tyoha tnyetak Musake, desikeo musti mo yal wasi mormyorifke ti tnyetak desy, ode musti mo tyoha mumu, de kete byilak sasam dakun.”

⁶ Klala ti ksala irkye mlay a i ti Hulasokwe, ti khyali ratohak ti Kristuske ne, neke rkesy ti Kitab Lanke de ma kbyohe, “Kete mtyanuk ti ralamy kralanare ma myena de mbyohe, ‘Esei ana syai bai wen sra eras Hulasokwe imin tike de?’ ” Neke kbuanke o, lema tperlu ma taten Kristuske ma yorw ei lasmyerke khaha ne ma yaorif ity, kali kyalake Kristuske myai nuske ktem ne de.

⁷ Dete lemamo kete mtyanuk ti ralamy kralanare ma myena de mbyohe, “Esei ana yorw ei wen mamatire ramin tike de?” Neke kbuanke o, lema tperlu ma taten Kristuske ma byetik toha wen mamatire ramin tike, ma syai ei lasmyerke khaha ne, kali kyalake Hulasokwe yaorif I toha mamatire de.

⁸ Keskye rkesy ti Kitab Lanke de ma kbyohe,

“Hulasokwe tunanare kyait a e de,
ma kimin ti ralamy kralanare de,
ma bisa ma mihes Hulasokwe tuna desikre.”

Nam Hulasokwe itanuk desikre, ne aramy miabrita ne, ma irire musti mo rtohak ti Kristuske.

⁹ Kali kolnye mtyanuk ti irire ode myou ohe, “Yesus ne wasikw Amam Lan a I,” ode kolnye mtyohak ti ralamy kralanare ohe, Hulasokwe yala Yesuske ma myorif huruk toha mamatire de, desikeo ana Hulasokwe yaorif a e.

¹⁰ Kali esei desike tyohak ti Yesuske kyor ralake kralake ode tyanuk ti irire ohe, “Yesus ne wasikw Amam Lan a I,” desikeo i desike Hulasokwe yaorif a i, ode byohe mlay a i.

¹¹ Kali rkesy ti Kitab Lanke ti khyali Kristuske ma kbyohe, “Esei desike tyohak ti I, ana lema ralake kakan de.”

¹² Nam kutanuk desikre mumu ne mlay ma kdi ti, kali Hulasokwe lema ikea ohe, iry matohak ti Kristuske neke iry Yahudi sir, ta iry a lema Yahudi sir, kali ti Hulasokwe ne, iry matohak ti Kristuske, sir ne mumu ne mais sir bo. Kali ity Ebut neke

cuma mo sasasam a I bo, ode Amam Lan I ti iry matohak ity ne mumu. Ode I neke yal eras mauskwe, ti iry a raten toha I ma iaorif sir mumu ne.

¹³ Kali rkesy ti Kitab Lanke ma kbyohe, “Esei desike iten ma ity Ebutke yaorif a i, desikeo ana ity Ebutke yaorif a i.”

¹⁴ Keskyede kolkyabei ma irire bisa ma raten ity Ebutke ma yaorif a sir, kolnye lema rtohak ti I de? Ode kolkyabei dakun ma bisa ma rtohak ti ity Ebutke, kolnye lenla rtomolu Brit Eraske ti khyali I ne de? Ode kolkyabei ma bisa ma rtomolu Brit Eraske ti khyali I, kolnye lema kika iry maabrita Brit Eras desy ti sir de?

¹⁵ Ode kolkyabei huruk ma irire bisa ma rabrita Brit Eraske, kolnye Hulasokwe lema iaso sir ne de? Dendye kola ne rkesy ti Kitab Lanke ma kbyohe, “Eras a ksyalik kolnye kika iry a rama ma rabrita Brit Eraske ne!”

Ktela iry Israel-are lema rabuma ratoha Brit Eraske ne

¹⁶ Keskyede lema irire mumu ne rbuma rtomolu ode rtoha Brit Eras desy. Kola ne Yesaya iry manety Hulasokwe wasi nyanoke tyanuk ma byohe,

“O ara Ebumy Hulasow O, nenma irire mumu ne lema rtohak ti Brit Eras aramy miabrita ne.”

¹⁷ Dendye irire bisa ma rtohak ti Kristuske, kolnye iry desikre rtomolu Brit Eraske. Ode irire bisa

ma rtomolu Brit Eras a kilosu Kristuske ne, kolnye irire rabrita Brit Eras desy ti sir.

¹⁸ Keskyede kena e ohe, iry a Yahudi nekre rtomolu Brit Eras ne deny ta lenla de? Ou, rtomolu de! Kali rkesy ti Kitab Lanke ma kbyohe,

“Rabrita britke ti nuske ktem ne mumu de.
Ode tun ratanukare kimelir ti kabei ta kabei bo, ti lasmyerke khaha ne.”

¹⁹ Keskyede kena e huruk ohe, iry a Israel-are rhe Brit Eras desy kbuanke deny ta lenla de? Ou, rhe de! Keskye rabrai ma rtoha, biar ma iry a lema Israel-are dakun o rhe brit desy de. Ode the ohe nam desikre mlay, kali heitlulswo Musa kyesy Hulasokwe tuna nekre a kmuna de, ma kbyohe,

“Ana kala iry a Israel e ne ma msyoi ralamy, kali kal eraske ti iry a lema Israel-are.
Ode ana kala e ma mika keyer, kali kal eraske ti iry salik, neke iry a mirekan sir o lema rahe Yaw ne.”

²⁰ Ode Yesaya ires ma kyesy a Hulasokwe tunanare ti khyali iry a lema Israel-are dakun, ma kbyohe,

“Iry a lema maobak Yaw nekre, sir neke rait Yaw de.
Ode iry a lema raten ma rahe Yaw nekre, kswusu tenakkwe ti sir dakun de.”

²¹ Keskyede khyali bangsa Israelke, dendye Yesaya kyesy a Hulasokwe tunanare huruk ma kbyohe,

“Sew kyaki nekre khwela simakw ma kukita sir
ma rma ma rait Yaw,
keskyede sir neke lema rtomolu ode lema rtoha
Yaw, de usut a khatu malkyakaw kmati bo.”

11

*Hulasokwe yilik iry a Israel-are dum ma yaorif
sir*

¹ Lemadendye waikw o hatnimakw e, kena e aduk. Anakyai Hulasokwe syanyeta wasi irire deny e? Lema koldyesy! Ktwanuk koldyesy kali Hulasokwe lema syanyeta iry Israel-are, kali yaw neke dakun o iry Israel a yaw, ode Abraham tes-nwo natu yaw, ma kosy a klolan Benyaminke.

² Mlay bain! Hulasokwe lema syanyeta wasi iry a heitlulswo iilik a sir ne. Ode ei neke mhye nam rakesy ti Kitab Lanke khyali Elia, ti kyoat Elia myanadu Israel-are ti Hulasokwe ma byohe,

³ “Ebukw Hulasow O, iry nekre rtabahunw a wasimw manety nyanoare de, ode raskyui-raskyay lat raeh heal ma raabar ti O nekre. Ode lenla kmwesan a kmworif bo, keskye senweke robak ma rtabahunw a yaw dakun.”

⁴ Keskyede Hulasokwe hyalas Elia ma byohe, “Oi ne lema mmwesan, kali kuneti irkye ribunke

itw (7000) ma wasikw iry a sir dakun. Sir neke dakun o, lema rsakiti ode rou ti adar Baalke elik!”

⁵ Ma selsel ne dakun o kola ne heitlulswō ti taras a Eliake, neke Hulasokwe yilik iry Israel-are dum ma wasi iry a sir, ma ktyoha rala eraske bo.

⁶ Ode kolnye yilik sir ne kyosy rala eraske bo, desikeo lema yilik sir ma ktyoha ktela raalanare. Kali kolnye Hulasokwe yilik irkye ma ktyoha ktela raalanare, desikemo Hulasokwe yilik irkye ne lema kyosy rala eraske.

⁷ Lemadendye ktela desike ksyusu ohe, iry a Israel-are mumu ne lema ratot a ksala ma biša ma mlay a sir ti Hulasokwe, biar ma ralkyaw sir ma robak ksala desy dakun. Keskyede cuma mo iry Israel a Hulasokwe iilikare, sir ne rmesan a ratot a ksala desy bo. Klala iry Israel a Hulasokwe lema iilik desikre, yala ralatare ma ngkora,

⁸ kola dene rkesy ti Kitab Lanke ma kbyohe,

“Hulasokwe yala iry desikre ma kola ne ktem sir ma lema rrekan a rhe namit-namit.
Ode kyala kyosy sew desike ma ti kyait senwe
Hulasokwe yala iry desikre matatare ma
kola ne lema kmyatakit,
ode molutare ma kola ne lema ktyomolu,
kali Hulasokwe yala sir ma lema rrekan a rhe
nam ramatakit o ratomolu desikre.”

⁹ Ode raja Daud syambayan ti Hulasokwe ma byohe,

“O Hulasow O, lemamo mala iry desikre wait a
nam a kihury ma ramukmuka sir ti desy,

ma kyala mait bonyo, nam desike kiihi i,
ma kbya masunw lan ne ma kdyan sir, ma
kyoil ti sir ma ktyoha wait ktela raalanare.

¹⁰ Ode mala iry desikre matatare ma kola ne kibol
ne, ma lema rmatakit, ma lema rhe toha
lbwetat.

Ode mala sir ma kyaki-kyaki ne rhar masunw
madan sir desy nini ratdu ti wenatare bo.”

*Iry a Yahudi-nare lema rbuma rtohak ti Kris-
tuske dendye Hulasokwe yaorif iry a lema Yahudi-
nare kali rtohak ti Kristuske*

¹¹ Lemadendye ktwanuk ti e ohe, iry a Yahudi-
nare lema rtohak ti Kristuske ne, neke kola dene
ratunas ma rlily ti rabobob. Mane ralily neke
lema bisa ma rbatar elik e? Lema koldyesy! De
khyali rala lim o sal ma lema rabuma ratohak ti
Kristuske desy, dendye Hulasokwe yal klelan desy
ti iry a lema Yahudi-nare ma rtohak ti I, ma yaorif
a sir. Ode ktela desikre kdi ti, ma khyury ma iry
a Yahudi-nare rsoi ralat ti iry a lema Yahudi-nare,
kali Hulasokwe yaorif iry a lema Yahudi-nare de.

¹² Lemade waikw o hatnimakw e, kyoat iry a
Yahudi-nare rala lim o sal ma lema rbuma rtohak
ti Kristuske, dendye Hulasokwe yal eraske ti iry a
lema Yahudi mamin ti nuske ktem ne o, mausw
ksyalik. Keskye kyoat iry a Yahudi a Hulasokwe
iilik nekre mumu ne rulak sir ma rtohak ti Kris-
tuske de, desike ne eras lan-lan ma kbyilak ma ity
mumu!

¹³ Lemade senwe kbwuma tun ana kutanuk
nekre, ktwanuk ti iry a lema Yahudi e ne, neke

kolnye: Kristuske syusu yaw ma kuka nyaso ti iry a lema Yahudi-nare. Ode khyali wasikw karya Hulasokwe inal ma yaw desy, dendye kumukmuka yaw.

¹⁴ Keskye kyosy wasikw karya desy, dendye kbwuma kala khwury a wasikw bangsake, neke iry Yahudi-nare ma rsoi ralat ti iry a lema Yahudi e ne, ma bisa ma iry Yahudi-nare dum a rtohak ti Kristuske dakun, ma Hulasokwe yaorif a sir.

¹⁵ Ode kyoat a Hulasokwe syanyeta iry a Yahudi-nare desy, desike ne ksalake it desy, ma Hulasokwe ika eras yor iry a lema Yahudi mamin ti nuske ktem ne. Keskyede ana kolnye Hulasokwe you iry a Yahudi desikre huruk, ti khyali ana kolnye ratohak ti Kristuske ne, desikeo ktela desike kersanke kisalsyalik i bo, kola ne iry a mamatire ramorif huruk ne!

¹⁶ Ode Abraham, Ishak, ode Yakub, sir neke Hulasokwe wasi irire sir desy, dendye tesnwo natut desikre dakun o Hulasokwe wasi iry a sir dakun. Iry a Yahudi desikre rola ne kotkwe, neke kolnye iry a Yahudi-nare ral kotu kisinare, desikeo kyalamo ral tebikan ma rabar ti Hulasokwe a kmuna, ma hina.* Dendye kotw tebikan raabar desy kbuanke o, Hulasokwe hina kotw desikre mumu dakun de. Koldyesy dakun o, iry a Yahudi-nare rola ne akwe. Ma kolnye Hulasokwe wasi akwe kawanke, desikeo aw desike ksanare mumu neke Hulasokwe wasi dakun.

* **11:16 11:16** Ti ayat ne kbyohe, *iry a Yahudi-nare ral kotu kisinare, desikeo kyalamo ral tebikan ma rabar ti Hulasokwe a kmuna, ma hina*. Ktela neke ktyoha tnyetak Musake. Neke bisa ma matos ti Bil. 15:17-21.

17-18 Ode iry a Yahudi-nare dakun o, rola ne aw a zaitun a ratan ma rapiarake. Keskyede kyoat Hulasokwe syanyeta iry Yahudi lema matohak ti I ne, neke sir ne rola aw a zaitunke ksanare dum, ti ranotw ma rabisak ba ne. Klala iry a lema Yahudi-nare, rola ne aw a zaitun matuhw ti utanke. Ode iry a lema Yahudi matohak e neke, myola ne aw zaitun matuhw ti utanke ksanare dum, ti ranotw ma ral ma ralel daku aw zaitun rapiarake ksana nenmo ranotw desy. Koldyesikemo ana aw a zaitun kimesan kituhw ti utanke ksanare, kiknam a kyosy aw zaitun ratan ma rapiara desy kawanke. Kali the ohe, lema akwe ksanake ne kiala kawanke ma malkyakaw ne, de kawanke ne kiala ma ksanare malkyakaw ne. Desike ne ksyusu ohe, iry a lema Yahudi e ne, myal eraske toha eras a heitlulswo Hulasokwe itetak ma inal ti iry a Yahudi-nare ne. Lemadendye ei neke kete mihmway iry a Yahudi Hulasokwe isanyeta sir ne, neke iry maola ne aw ksana ranotw ma rabisak ba nekre. Kolnye ei ne mbyuma mbyitil tenamire ma atat, desikemo mnyenas ohe, ei neke myola aw ksana ralel daku akwe ktenanke ne bo.

19 Keskye ti iry a lema Yahudi e nekre, anakyai dum a mbyitil tenamire ma mtyanuk ma mbyohe, “Keskye iry a Yahudi maola aw ksana ranotw ma rabisak ba nekre, Hulasokwe byisak e ba, mamode aramy neke Hulasokwe yal aramy ma aramy myeluk a e ma Hulasokwe wasi iry aramy, kola ne aw ksana salik ranal ma ralel ti akwe ktenanke ne!”

20 Nam mitanuk desikre mlay. Keskye mnyenas! Hulasokwe byisak iry a Yahudi desikre ba de, kali sir neke lema rtohak ti Kristuske. Klala

Hulasokwe yal iry a lema Yahudi e ne, ma wasi iry a e de, kali mtyohak ti Kristuske. Dendye kete mbyitil tenamire ma atat, de mijaga wasimy mormyorifare ma kete mila toha wasimy tothohakke ti Kristuske ne.

²¹ Kali kolnye Hulasokwe lema itartaur ralake ma yotuk iry a Yahudi lema matohak desikre ba, desike ne rola aw zaitun a rapiarake ksana mamin ti ktenanke kyala kyosy khyehyeike, ma ranotw ode rabisak ba ne. Dendye ei ne ana Hulasokwe yotuk e ba dakun, kolnye lema mtyohak ti Kristuske.

²² Lemadendye bisa ma tatos Hulasokwe rala eras inal ti irire ne, ode tatos mo kyeyer ma yukun irire dakun. Kali syusu keyerake ti iry a Yahudi lema matohak ti Kristuske ne de, klala Hulasokwe syusu rala eraske ti iry a lema Yahudi e ne dakun, kolnye mimorif ne mo myety ral sasamke myor Kristuske, ti kiba knaru ne. Dete kolnye lema mbyuma mtyohak ti Kristuske de, desikeo ana Hulasokwe yotuk e ba dakun, kola dene aw ksanare ti ranotw ma rabisak ba ne.

²³ Keskye kolnye iry a Yahudi desikre rtunik wait lim o sal ba, ma rulak sir ma rtohak ti Kristuske, desikeo ana Hulasokwe yal sir ma wasi iry a sir huruk, kola dene aw ksanare ti ranotw ma rabisak ba ne, maktei o ral huruk ma rlel ti ktenanke huruk ne. Hulasokwe bisa ma yala koldyesy kali haretke kimin I, ma yal sir huruk ei wenatke.

²⁴ Lemadendye iry a lema Yahudi e ne, myola dene aw zaitun matuhw ti utanke, ode iry a Yahudi matohakare rola dene aw zaitun rapiarake. Kali kolnye aw zaitun matuhw ti utanke, ti

ranotw ksanare ma ranal ma ralel ti aw zaitun ratan ma rapiarake ktenanke ne, neke ksunw ma kbyilak ti kolnye ral aw zaitun rapiarake ksana ranotw ma rabisak ba ne, ma ranal huruk ma ralel ti ktenanke huruk ne. Koldyesy dakun o, kolnye Hulasokwe yal iry a lema Yahudi e ne ma wasi iry a e, desikeo kbyilak ti desy dakun o, ana yal iry a Yahudi matohakare dakun ma wasi iry a sir dakun.

Hulasokwe syusu rala eraske ti irire mumu

²⁵ Waikw o hatnimakw iry a lema Yahudi e, kbwuma klwosu Hulasokwe wasi rekryeky a lulswa kihunik ike ti e ma mhye, ma kete mbyi-til tenamire ma atat, kali mryekan o Hulasokwe yilik e a mmyesan bo. Neke nam mahunik i ma irire lema rahe elik ne, neke kolnye: Senweke iry a Yahudi-nare dum a ralatare ngkora, ma lema rbuma rtohak ti Kristuske. Keskye wait a ktela desike ana klyakut koldyesy nini, sew a iry a lema Yahudi Hulasokwe ilik nekre mumu ne rtohak ti Kristuske.

²⁶ Ode kyoat sew desike kdi ti, desikeo Hulasokwe ana yaorif iry a Israel-are mumu. Kola ne rakesy ti Kitab Lanke de ma kbyohe,

“Iry a maorif irkye, neke ana yosy a Sion[†] ma mya.
I neke ana syos a Yakub tesnwo natu nekre
wait lim o sal nekre ba.”

²⁷ Kola dene Hulasokwe tyanuk ma byohe,

[†] **11:26 11:26** Ti ayat ne kbyohe, *yosy a Sion*. Any a Sion neke ksyusu *nus lan Yerusalemke*. Ode iry mahe tel ti Kitab Lanke dakun o rbohe Sion neke ksyusu ti wen sra eraske. **11:26 11:26** Yes. 59:20-21

“Kuhatetak kor sir ohe, ana kswos a wait lim o sal nekre ba.”

²⁸ Ode khyali iry a Yahudi-nare lema rou ma ral Brit Eraske, lemade Hulasokwe syorw a sir. Ode kyosy ktela desy, mane kyety eraske ti iry a lema Yahudi e ne. Ode biar ma koldyesy, keskyede heitlulswu Hulasokwe yilik iry Yahudi-nare de, dendye lyobak iry a Yahudi-nare a nggora, kali nyenas wasi inahatetak ihatetak inor ebnwo matrumat desy.

²⁹ Kali kolnye Hulasokwe yilik irire, ode yal eraske ti sir de, desike o lema yal a yolik nam iala desikre it toha sir elik.

³⁰ Lulswu iry a lema Yahudi e neke lema mtyomolu ode lema mtyoha Hulasokwe. Keskyede selsel neke Hulasokwe syusu rala eraske ti e, kali iry a Yahudi-nare lema rtomolu ode lema rtoha Hulasokwe de.

³¹ Keskye ana kyait sekwe bonyo, Hulasokwe ana syusu rala eraske ti sir dakun, kola dene isusu rala eraske ti iry a lema Yahudi e ne, biar ma selsel ne iry Yahudi-nare lema rtomolu ode lema rtoha Hulasokwe dakun.

³² Kali Hulasokwe lyura irire mumu ne ma ralatare ngkora, mane lema ratomolu ode lema ratoha I ne. Ktela desike kyety eta sir, kola ne iry mamin ti sey metmetke kralake ne. Hulasokwe yala koldyesy, mamode bisa ma syusu rala eraske ti irire mumu.

Tleru Hulasokwe Anike khyali isusu wasi loblobakke ma ity ne!

³³ Hulasokwe wasi eraske lan ma kbyilak de kbyilak! Ode I neke hye sai ta sai bo, ode wasi hehei lulw o lyakwe ti itilik mlakye o salke ne kbya demdemw ksyalik! Lema irkye it a bisa ma hye nam iohutare kbuanare, ode lema irkye it a bisa ma hye, ti kolkyabei ma Hulasokwe tyenuk wasi karyaare mumu ne.

³⁴ Kola dene rkesy ti Kitab Lanke de ma kbyohe,

“Ese bisa ma hye nam ity Ebut Hulasokwe irekanare de?

Ode ese bisa ma syurat ity Ebut Hulasokwe de?

³⁵ Ode ese bisa ma yal nam dum ti ity Ebutke, mamode ana ity Ebutke musti mo yeluk ti iry desy de?”

³⁶ Kali Hulasokwe I ne iala nam nekre mumu ne, ode I ne tyenuk nam desikre mumu ne ma kimin. Ode yala koldyesy, mamode nam iala nekre mumu ne tleru I. Lemadendye mmya ma talan I, ode tleru Anike nini nam! Amin.

12

Tal ity ralat a kusunare ma tmorif ti Hulasokwe

¹ Waikw o hatnimakw e! Khyali Hulasokwe syusu rala eraske ma ity de, lemade kal ralakkwe kralake ma kswurat e, ma myal tenamire mumu ti Hulasokwe ma wasi, ma kola dene heal mamorif a minal ma miabar ti Hulasokwe ne ma hina, ma kyala Hulasokwe ralake ma kimukmuka i.

Dendye myal tenamire mumu ti Hulasokwe, kali sambayan a mlakye desy.

² Lemade kete mlyura ma iry lema mahe Hulasokwe ne rhury a e, ma mtyoha sir ti nam kyalamo rarekan o raala ti nuske ktem ne. De musti mo mlyura e ma Hulasokwe yaharw a e ti nam mirekanare, ma wasimy mormyorifare harharw, mamode nenmo bisa ma mhye bain-bain nam Hulasokwe ibuma mialanare. Nam ibu desikre eras, ode mlay, ode kyala ralake ma kimukmuka i.

³ Kali Hulasokwe syusu rala eraske ma yilik yaw, ma kuka nyaso ti Yesuske de, lemade kswurat e mumu ma mhye toha lbwetamy ma kete mryekan ohe, ei neke eras e ma kbyilak iry salik. De musti mo mbyihy mamak tenamire, ma ktyoha it o it neke wasimy hehe malkyakaw Hulasokwe inal ti e nekre, ti khyali mitohak ti Kristuske ne.

⁴ Kali irkye tenan neke cuma mo sasasam bo, keskye kika sima o lwau, kika mata, ode kika molu, ma nam mamin ti irkye tenan neke ribun. Ode nam desikre mumu ne it o it neke wait karyaare lema mais.

⁵ Kola dene iry matohak ity ne dakun, ma biar ma ity neke ribun a ity, keskyede Kristuske yeti yahuk ity ti sasam, ma ity ne mumu neke Kristuske tenanke desy. Dendye it de syaluk it, kali ity neke sasasam ity ti Kristuske.

⁶ Ode Hulasokwe yal hehe malkyakakwe ma ity neke lema mais, ma ktyoha rala eraske. Dendye mmya ma tal hehe malkyakaw desikre ma tsaluk irire. Ode kolnye Hulasokwe yal hehe

malkyakakwe ti irkye it, ma yety Hulasokwe wasi nyanoare, desikeo iry desike musti mo yety nyano desy, ma ktyoha nyano itohak o Hulasokwe inal ti i desy.

⁷ Ode kolnye Hulasokwe yal hehe malkyakakwe ti irkye it ma kyarya ti ribun matohakare, desikeo iry desike musti mo kyarya kyor ralake kusuke. Ode kolnye Hulasokwe yal hehe malkyakakwe ti irkye it ma yajar irire, desikeo iry desike musti mo yajar sir kyor ralake kusuke dakun.

⁸ Ode kolnye Hulasokwe yal hehe malkyakakwe ti irkye it ma isurat nam, desikeo iry desike musti mo syurat irire kyor ralake kusuke. Ode kolnye Hulasokwe yal hehe malkyakakwe ti irkye it ma itera nam, desikeo iry desike musti mo itera nam kyor ralake kusuke. Ode kolnye Hulasokwe yal hehe malkyakakwe ti irkye it ma yety lulkwe ti irire dum, desikeo iry desike musti mo indil ma yety lulkwe. Ode kolnye Hulasokwe yal hehe malkyakakwe ti irkye it ma syusu rala eraske ti irire ti sai ta sai bo, desikeo iry desike musti mo syusu rala eraske kyor ralake krala mamukmuka ike.

Snuratke ma tamorif ne musti mo it de lyobak it

⁹ Waikw o hatnimakwe, musti mo mlyobak irire kyor ralamy kusunare bain-bain. Neke musti mo mimnisik ktela atyat sai ta sai bo, ode mkyumak malkyakaw a ktela erasare.

¹⁰ Ode musti mo it de lyobak it, kola dene milobak waimy elikare ne. Ode myalkyaw e ma it de yalan it, ma kbyilak mialan tenamire kimesan ne.

11 Ode kete mikbo, de musti mo mindil ma mk-yarya ti ity Ebut Hulasokwe.

12 Ode musti mo mimukmuka mimarmara e ma mmyea ti I, ma mikita nam eras ana inal ti e ne. Ode musti mo myalkyaw ralamire manenen ti kyoat masunkwe kidan e ne. Ode kyaki-kyaki ne musti mo msyambayan.

13 Ode kolnye nam sai ktyol ti Hulasokwe wasi irire, desikeo musti mo msyaluk a sir. Ode kolnye mwakunare dum a rmai wasimy a hnuke, desikeo musti mo mdyakin ma myal sir ei wasimy sey kralanare, biar ma lenla mhye sir dakun.

14 Ode kolnye irire roban de rtaba e, desikeo musti mo miten Hulasokwe ma yal eraske ti sir, de kete msyoba sir.

15 Ode kolnye irire ramukmuka sir, musti mo mimukmuka e a myor sir dakun. Ode kolnye irire rser, musti mo msyer a myor sir dakun.

16 Ode mimorif neke musti mo myety ral sasamke. Ode kete mbyitil tenamire ma atat, de musti mo mika lui myor iry a lema maber o rtahal nekre. Ode kete mryekan ohe mhye ei lulw o lyaw ma mbyilak iry salik.

17 Ode kolnye iry dum a rala atyat a e, desikemo kete myoil atyatke kyor atyatke ti iry maala atyat e desy, de myoil myor ktela eraske bo. Ode mryekan mamak e ti sai ta sai, mamode ei ne bisa ma myala ktela erasare bo, ma kolnye esei ta esei bo, neke yatos ktela miala desy, desikeo you ohe nam miala desy eras.

¹⁸ Ode musti mo myalkyaw e ma myobak ksala ma bisa ma mmyorif ti inaka eraske, myor esei ta esei bo.

¹⁹ Lemade waikw o hatnimakw kulobak e! Kete myoil atyatke ti iry maala atyat e nekre, de myeta ba ti Hulasokwe ma andeka I neke myesan a yukun sir bo. Kali rkesy ity Ebut Hulasokwe tunanare ti Kitab Lanke kralake ma kbyohe,

“Yaw ne haretke kimin Yaw, ma koil ti sir,
ode ana kukun sir ma ktyoha wait ktela atyat
raalanare.”

²⁰ Dendye kete myoil atyatke kyor atyatke, de musti mo mtyoha nam rakesy ti Kitab Lanke ti kibohe,

“Kolnye iry a mamnisik oke imlar, desikeo mal
kotw ti nya.

Ode kolnye byatu, desikeo mal werke ti yenw.
Kali kolnye mala ti i koldyesy, desikeo mala i ma
myay ma desy.”

²¹ Dendye kete mlyura ma atyatke khyareta e,
de musti mo myal eraske ma myal ma mkyawelak
a atyat desy.

13

Tatotomolu tel ti maharetake

¹ Waikw o hatnimakw e! Ity ne mumu neke musti mo it o it neke, tatotomolu tel ti maharetake. Kali maharetanare it o it neke ratot haretke toha

Hulasokwe, ma rhareta. Ode iry maharetanare rahareta ne, cuma mo kali Hulasokwe yilik sir.

² Dendye esei desike syorw maharetake, desikeo syorw a Hulasokwe wasi haretke ma desy. Ode ktela iala desike khyury ma ana maharetake yukun i. Ode ktela raukun i desy ktyoha Hulasokwe ibuke.

³ Ode kolnye esei desike yala ktela erasare, desikeo lema imtaut maharetake. De cuma mo iry a maala ktela atyatare, sir ne ramtaut maharetake ne. Dendye kolnye mbyuma lema mimtaut maharetake, desikemo mimorif ne musti mo myala ktela erasare kmyesan bo. Koldyesikemo ana maharetake yalan a e.

⁴ Kali mahareta desikre Hulasokwe wasi makaryaare sir desy, ma rkarya ma rety eraske ma ity. Keskyede kolnye myala ktela atyatare, desikemo musti mo mimtaut mahareta desikre, kali sir desike haretke kimin sir, ma bisa ma rukun a e. Ode sir desike Hulasokwe wasi makarya sir, dendye Hulasokwe yaso sir ma rukun iry maala ktela atyatare, ma ktyoha Hulasokwe keyerake.

⁵ Dendye musti mo mitotomolu tel ti maharetake, neke lema khyali cuma mo mimtaut ti ana raukun e ne bo, de mitotomolu tel, kali ralamy kralanare ktyanuk ohe, nam miala desikre mlay dakun.

⁶ Ode kali mitotomolu tel ti maharetake desy, dendye musti mo msyelw a uskwe dakun. Kali kyoat mahareta desikre kyaki-kyaki ne rkarya wait karyake, neke rkarya ti Hulasokwe ma desy.

⁷ Dendye musti mo myal nam sai ta sai ti wasimy maharetanare, ma ktyoha ksalanare. Neke musti mo msyelw a uskwe ti maily uskwe, ma ktyoha haretke itunik ti eke. Ode musti mo myal alanke ti wasimy maharetanare, de kete msyorw a sir.

Tamorif ne musti mo it de lyobak it kali sew a Yesuske ima huruk ne kyarasy de

⁸ Ode kolnye myutan nam dum toha esei ta esei bo, desikeo musti mo adoko msyelw a utan desy ma ktei elik. Ode wasimy harharke it ne a nggora, neke musti mo it de lyobak it ti kiba knaru ne. Kali esei desike ilobak iry, desikeo tyoha tnyetak Musake mumu ma desy.

⁹ Kali rkesy ti tnyetak Musake ma kbyohe, “Kete maldotw, kete mtwabahunw iry, kete munamet, ode kete mmwaboka irire wait namit-namit dakun.” Ode lema tnyetak deat desike bo, de ktyabal tnyetak idanare mumu dakun, neke kiwahuk i ti tnyetakke sasam, neke ne: “Mlwobak irire, kola dene mulobak tenamkwe ne dakun.”

¹⁰ Kali kolnye esei desike ilobak iry, desikeo lema bisa ma yala ktela atyat namit-namit ti irkye. Dendye esei desike ilobak iry, desikeo tyoha tnyetak Musake mumu ma desy.

¹¹ Lemade ei neke musti mo mtyoha bain-bain snurat nenmo kusurat ti e desy, kali mhye ohe taras selsel ne kolkyabei de. Neke sekwe kyait de, ma kete myola iry a maenafke, de musti mo myola iry a mabatarke. Kali senwe lema kola sew a kyoat nenmo tatohak ti Yesuske ne. De sew a ity Ebut Yesuske ima huruk ma iaorif ity ne kyarasy de.

¹² Lemade ity wait mormyorifare ti nuske ktem ne kyala ma ktei mane, ode ity Ebutke lema soso bonyo mya de, kola dene metdyetke kyala ma ksyakut mane, ode msarinke kyala ma kmya mane. Dendye kete tola ne iry a mamorif ti kelerakokke ne, de totuk lakhidik tot atyat taala desikre ba. Ode musti mo tala ktela erasare, kola ne iry a mamorif ti madelafke ne. Koldyesikemo, bisa ma tsorw tal haret kelerakok desy, kola ne suldatare rahonak rabbit hnutanke, ode rakumak mnas o mtubal ma ti ramdiriat ne.

¹³ Dendye tamorif ne, musti mo tala ktela erasare kmyesan bo, kola ne iry a mamorif ti madelafke ne. De kete tobak klelan ma ttoha kalkalare ma taknam lan ti, ode kete tenw tua ma kyala ity, ma tala ktela atyatare ti kalkal desikre dakun. Ode kete wamfwetare ror wamwanire it de hyury a it koi-kay ma rala tot atyatare. Ode kete ttoha ity wait dakdyakin atyat kihareta ti ity ralat a kralanare ne. Ode kete it de iilir yor it, ode kete it de syoi rala it dakun.

¹⁴ De lemamo mmya ma tal ity Ebut Yesus Kristuske wasi mormyorifke, ma tmorif kola I. Kola dene tahonak rabbit harharkwe ne, mamode ity wait mormyorifare kola Kristuske dakun. De kete trekan ti ity wait dakdyakin atyatare ne ma tala ma ktyoha.

14

Kete toit sal ti ity wait o ity hatnimat mato-hakare

¹ Waikw o hatnimakw e! Ti iry matohak ity ne mumu ne, dum a wait tohtohakare lenla malkyakaw ti Yesuske, dendye musti mo myal sir ma myor sir eras-eras bo, de kete mitaur nunw myor sir, ti ktela raala ma ktyoha nam rarekanare ma mlay ti Hulasokwe ne.

² Neke iry matohakare dum a rtohak ohe, bisa ma ra kotw sai ta sai bo. Klala iry a wait tohtohakare lenla malkyakaw ti Yesuske ne, dum a cuma mo ra sayorke bo, kali rtohak ohe Hulasokwe byu eta ma kete ra heal o ail nekre.

³ Ode iry a mana kotw sai ta sai bony ne, kete mihmway iry a cuma mo mana sayorke ne bo. Koldyesy dakun ti iry a cuma mo mana sayorare, kete myoit salke ti iry a mana kotw sai ta sai bony ne. Kali Hulasokwe yal e mumu ma wasi iry a e de.

⁴ Lema wasimy haretke ma myoit sal ti iry salik wasi atke, de at desike ana wasi amam lanke myesan a bisa ma yohut ohe, wasi at desike ikarya neke mlay ta sal. Koldyesy dakun ti ity wait o ity hatnimat matohakare, kali ity Ebut neke ei ne mumu ne wasimy Amam Lan a I. Dendye I neke myesan yohut ohe wasi irire rakarya neke mlay ta sal. Ode ity Ebutke yal e ma wasi iry a e de, biar ma mi heal o ail, ta mi sayor bo, kali ity Ebutke wasi haretke ana kyala e ma mtyohak manenen ti I.

⁵ Ode iry matohakare dum rrekan ohe, sekwe it a eras ma kbyilak sew ida nekre, ma tawahuk ity ti sew desy ma tsambayan. Klala iry matohakare dum huruk a rrekan ohe, sew nekre mumu neke mais bo, ma tawahuk ity ti ma tsambayan. Keskye mnyenas, it o it neke musti mo

tyoha nam irekanare ma mlay ti Hulasokwe.

⁶ Ode iry marekan ohe, sekwe it eras ma kbyilak sew idanare ne, iry desy yala koldyesy mamode yalan ity Ebutke. Ode iry a mana kotw sai ta sai bo, neke yala koldyesy, mamode yalan ity Ebutke dakun, dendye syalak eraske ba ti Hulasokwe ti khyali kotw desikre. Koldyesy dakun ti iry a mana sayorke ne bo, neke yala koldyesy, mamode yalan ity Ebutke, ode syalak eraske ba ti Hulasokwe dakun.

⁷ Kali mlay bain o ti iry a matohak ity neke, lema irkye it a myorif ti tenanke bo. Ode kolnye myaty, desikeo lema myaty ma ktyoha ibuke.

⁸ Kali kolnye tmorif, desikeo tmorif ti ity Ebutke, ode kolnye tmaty, desikeo tmaty ti ity Ebutke dakun. Dendye ity neke ity Ebutke wasi ity, biar ma tmaty ta tmorif dakun.

⁹ Khyali desike mane Kristuske myaty, maktei o myorif huruk, mamode I neke Amam Lan a I ti iry a mamatire, ode Amam Lan a I ti iry a mamorifare dakun.

¹⁰ Dendye kyanmwane mires ma mioit salke ti waimy o hatnimamy matohakare ne de? Ode kyanmwane mihmway sir dakun ne de? Kali ana taktemtem mumu neke tba ti tamdiry ma tsara Hulasokwe, ma ana byihy a ity ma yohut tun ma ity.

¹¹ Kali rkesy ti Kitab Lanke ma kbyohe,

“Ity Ebutke tyanuk ma byohe, ‘Yaw ne kmwesan kuhatetak ti e ohe,

irire mumu neke, ana rsakiti ti wasikw lulul-
ulw ne,
ode ana irire mumu ne rou ohe, Yaw neke,
Hulasow a Yaw.' ”

¹² Lemadendye ity ne mumu ne, ana tba ti tsara Hulasokwe, ma Hulasokwe yena ity. Desikeo it o it neke musti mo thalas I, ma it o it neke tlosu ti I, ti ity wait ktela eras o atyat taala mumu ti nuske ktem ne.

Kete tala namit-namit ma khyury ma ity wait matohakare rdi ei lim o sal

¹³ Lemadendye waikw o hatnimakw e, kete it de yoit sal ti it de, de ei neke musti mo mijaga mamak a e, ma kete ktela mialanare khyury ma ity wait matohakare, rdi ei lim o sal.

¹⁴ Ode khyali yaw neke kety ral sasamke kor ity Ebut Yesuske, dendye ktwohak ohe lema kika kotw a rasusi de. Keskye kolnye irkye it a tyohak ohe, kika kotw rasusi, keskye kolnye nya kotw desikre, desikeo yala lim o sal ma desy.

¹⁵ Ode kolnye waimw o hatnimamw matohakke it ma kyoat a yatos o ma mu kotw rasusi desy, desike bisa ma khyury ma iry maatos desike ralake lema ktyeka i ma desy. Koldyesikemo ktela muna kotw desike ksyusu ohe, lema mlwobak waimw o hatnimamw matohak desy. Lemadendye kete mhwury ma iry matohak desy ila toha wasi tothakke ti Kristuske, khyali kotw muna desikre. Kali kolnye koldyesy, desikeo muhnutuk i ma desy. Dendye kete mala koldyesy, kali Kristuske myaty khyali i dakun de.

¹⁶ Lemadendye kete wasimw ktelanare khyury ma waimw matohakare rdi ei lim o sal, biar ma mhwe ohe wasimw ktela muala desikre mlay. Dendye kete mala ktela desikre de, mamode irire lema roit salke ti o.

¹⁷ Kali kolnye Hulasokwe hyareta ity wait mormyorifke, desikeo nam tana o taenw nekre lema kika kbuan. De nam maka kbuanke, neke tamorif ne mlay a ity ti Hulasokwe, ode taka eras tor iry salik, ode tamukmuka tamarmara ity, kali Hulasokwe Memeanke kkyarya ti ity ralat a kralanare de.

¹⁸ Dendye kolnye esei desike tyoha Kristuske ma myorif koldyesy, desikeo ktela iala desikre kyala Hulasokwe ralake ma kimukmuka i, ode ana irire ralan a i dakun, ti imorif koldyesy ne.

¹⁹ Lemadendye mmya ma talkyaw ity bain-bain, ma tamorif neke tala ktela kihury ma taka eras tor ity wait o ity hatnimatare ne. Ode it de yalkyaw it ti ity wait tohtohakke, ma malkyakaw.

²⁰ Dendye kete khyali kotkwe bo, desikeo taskyui-taskyay karya Hulasokwe ikarya ti ity wait o ity hatnimat matohakare ralat a kralanare. Kali mlay bain o lema kika kotw a rasusi de, keskye kolnye ta kotw desike ma khyury ma iry salik ra dakun, desikeo sal ity ma desy. Kali desike ne thury ma ity wait o ity hatnimatare rdi ei lim o sal ma desy.

²¹ Dendye eras ti kolnye kete mi heal a kisinare, ode kete myenw a tasy maiskye kwen makitkye, dete lemamo kete myala ktela salik dakun, kolnye ktela desikre khyury ma waimy o hatnimamy matohakare rdi ei lim o sal.

²² Lemadendye kolnye mtyohak o ktela miala desike lema kyety a lim o sal ti e, desikemo kimin ti ralamy kralanare bo, mamode Hulasokwe mye-san a hye bo. Eraske kimin ti iry a itohak o nam iala desikre mlay ti Hulasokwe, ode kyoman i o lema sal i, khyali nam iala desikre.

²³ Keskyede kolnye esei desike ralake kakan ti ina kotw a irekan o kinety lim o sal ti i desy, biar ma Hulasokwe byohe kotw desike lema rasusi dakun, desikemo Hulasokwe yohut de, ma ana yukun a i, kali ktela iala desike lema ktyoha nam itohak o mlay ti Hulasokwe ne. Kali kolnye tala ktela sai ta sai, keskye lema ktyoha nam tatohak o mlay ti Hulasokwe ne, desikemo tala lim o sal ma desy.

15

Musti mo tala ity wait matohakare ma ralatare ksyenan, de kete trekan ity tenatare kmyesan bo

¹ Waikw o hatnimakw e! Ity neke ity wait tohtohakare malkyakaw de, ode the ktela Hulasokwe ilura ma taalanare de. Dendye musti mo kete toit salke ti iry a wait tohtohakare lenla malkyakaw nekre, ode lenla rhe ktela Hulasokwe ilura ma raalanare. De musti mo taneti ity ralatare ti ktela lenla rahe desikre, ode kete tala ktela desikre ma kyala ity ralatare ma ksyenan bo.

² De ity neke, it o it ne musti mo tala ktelanare ma kyala ity wait o ity hatnimat matohakare ralatare ma ksyenan, ma kyety eraske ti sir. Ode musti mo tala koldyesy, ma wait tohtohakare ktyabal ma malkyakaw.

³ Kali Kristuske dakun o lema ryekan tenanke kmyesan bo, biar ma I neke Iry a Hulasokwe isusu ma ika Raja ode yaorif irkye. Kola tun Kristuske itanuk ti Hulasokwe ma rakesy ti Kitab Lanke ma kbyohe,

“Nam sai irire rtanuk ma rahmway O, nam desike kola ne rtanuk ma Yaw ma desy.”

⁴ Dendye nam sai ta sai heitlulswo rakesy mumu ti Kitab Lanke ne, neke rkesy ma kyajar ity. Ode nam kiajar ity desy kyalkyaw ity ralatare, ma ity ne bisa ma taneti ity ralatare manenen ti kyoat masunkwe kidan ity ne, mamode bisa ma tmea ti Hulasokwe ma takita bo.

⁵ Hulasokwe I ne yala ity ma taneti ity ralatare manenen, ode I ne yaluka ity ode yalkyaw ity ralatare ti kyoat masunkwe kidan a ity ne. Dendye yaw ne kswambayan ma kuten ma Hulasokwe syaluk e, ma mimorif ne myety ral sasamke, ma ktyoha nam Yesus Kristuske ialanare dakun.

⁶ Ode myety ral sasamke koldyesy, mamode bisa ma miktemtem a mlyeru Hulasokwe, neke ity Ebut Yesus Kristuske Ama, ode wasi Hulasow a I dakun.

Iry matohakare musti mo it de yal it eras kola Kristuske inal ity ma wasi iry a ity ne

⁷ Lemadendye waikw o hatnimakw e, Kristuske yal e ma wasi iry a e de, dendye kuten ma lemamo ei neke it de yal it eras-eras bo, kola ne Kristuske inal a e ne. Musti mo myala koldyesy, mamode irire rleru Hulasokwe.

⁸ Dendye mnyenas, kali Kristuske mya kola makaryake ti iry a Yahudi-nare, ma syaluk sir, ma ksyusu ohe, Hulasokwe nyenas wasi tnyetak a heitlulswo ihatetak inor Yahudi-nare ebnwo matrumat ne. Ode khyali desike mane, irire mumu ne rhe ohe, Hulasokwe wasi inahatetakare mumu ne, kyaki-kyaki ne musti mo kdi ti.

⁹ Ode Kristuske mya ma syaluk iry a lema Yahudi-nare dakun, ma rleru Hulasokwe, kali syusu rala eraske ti sir. Kola dene rkesy tun Daud itanuk ti ity Ebutke ne, ti Kitab Lanke ma kbyohe,

“Koldyesike mane kyoat kor iry a lema Yahudi-nare, desikeo kswalak eraske ba ti O, ode kuora ma klweru Animkwe.”

¹⁰ Ode rkesy huruk ma kbyohe,

“Hei iry a lema Yahudi e, mmya ma mimukmuka mimarmara e a myor Hulasokwe wasi irire, neke iry a Yahudi-nare.”

¹¹ Ode ktyanuk huruk ma kbyohe,

“Hei iry a lema Yahudi e, ei ne mumu ne mmya ma mlyeru ity Ebut Hulasokwe Anike.

Hei iry mamin ti nuske ktem e, mmya mumu ma mlyeru I!”

¹² Ode Yesaya Hulasokwe wasi manety nyanoke kyesy dakun ma kbyohe,

“Isai neke tesnwo natuke it ana mya, ma hyareta
iry a lema Yahudi-nare,
ode sir ne ana rmea ti I bo.”

¹³ Dendye kswambayan ti Hulasow a maala
ity ma tamea ti I ne, ma kuten ma yala ralamy
kralanare ma kimukmuka kimarmara i, ma ina-
mukmuka ike lema ktyol ti e elik, kali mtyohak
ti I. Ode kuten dakun ma yal wasi inaka eraske
ti e, ma kimin ti ralamy kralanare ma lema ktyol
ti e elik, kali mtyohak ti I. Kuten koldyesy ma
Hulasokwe Memeanke kamalkyauke kkyarya ti
ralamy kralanare, mamode ktyabal a ktyabal toha
ma mmyea ti I.

Paulus lyosu wasi karya ikarya ti Hulasokwe ne

¹⁴ Waikw o hatnimakw matohak e! Yaw neke
ktwohak ohe, ei neke eras e a ksyalik. Ode wasimy
heheke kbyenw ti nam Hulasokwe ibuke de, ma ti
kyal ei neke bisa ma it de syurat it dakun de.

¹⁵ Ode biar ma koldyesy, keskyede kures ma
kkwesy ktelake enai ne ti atyahy ne, ma kala e
ma minenenas ktela desikre. Kala koldyesy kali
Hulasokwe syusu rala eraske ma yaw ti karya inal
ma yaw desy,

¹⁶ dendye kuka nyaso ti Yesus Kristuske, ma
kswaluk iry a lema Yahudi-nare. Neke kabrita Brit
Eras manosy Hulasokwe ti sir, ma rtohak ti Kris-
tuske. Ode Hulasokwe yal sir ma wasi iry a sir, kali
Hulasokwe Memeanke kyala sir ma nelnyelnyely
a sir. Koldyesikemo wasikw karya ne, neke kola
iry mabaa klen ti irkye yor Hulasokwe ne wait

karyake, ode iry a lema Yahudi desikre rola heal a kuabar ti Hulasokwe ne.

¹⁷ Lemade kyosy kunety ral sasamke kor Yesus Kristuske ne, dendye kumukmuka yaw, kali wasikw karya kukarya ti Hulasokwe desy.

¹⁸ Ode lema kures ma ktwanuk ktela sai ta sai, de lenla nam sai Kristuske iala desikre, ti kyoat yal nam kuala o kutanuk nekre ma yal ma kyala iry a lema Yahudi-nare ma rtomolu ode rtoha Hulasokwe.

¹⁹ Ode Hulasokwe Memeanke kyal haretke ma yaw, ma kala ktela desikre ktyabal ktela masalsyalik iare ode nyatos manosy Hulasokwe, mamode sir ne rtoha Hulasokwe. Dendye kala ate karyaakw a kuabrita Brit Eras malosy Kristuske ne, neke kyala kyosy a nus Yerusalemke ma ti kyait a propinsi Ilirikumke.*

²⁰ Kali kyala kyosy khyehyeike kdwakin a ksyalik ma kabrita Brit Eraske ti wen a irire lenla ratomolu Kristuske ti ne. Kala koldyesy ma kete kswaur iry salik wait karyaare, kola dene iry a masadiri sey ti iry salik wait fanderen raalanare ne.

²¹ Ktela kuala desike kola ne rakesy ti Kitab Lanke ma kbyohe,

“Iry a lenla rtomolu irire ma rabrita brit malosy I ne, neke ana ratos I,
ode iry a lenla ratomolu elik nyano malosy I ne, neke ana rtomolu wasi nyanoke ode rhe kbuanke.”

* **15:19 15:19** Heitlulswa propinsi Ilirikum neke kimin ti lasmyer a selsel ne negara Albaniake ode negara Bosniake kimin ti ne.
15:21 15:21 Yes. 52:15

Paulus ryeky ma byai nus lan Romake

²² Waikw o hatnimakw matohak e! Khyali kuabrita Brit Eraske ti hnu salik nekre, dendye khyury ma lenla bisa ma kbwa ti ksweak e ti desy.

²³ Keskye senweke wasikw karyake ti hnu salik nekre ktei de. Ode ainke enai mane de, neke kmwaboka e a ksyalik ma kbwuma ti ksweak e ti desy.

²⁴ Dendye krweky ma kyoat a ana kbwai Spanyol, desikeo kswery ei wasimy nus desy, ma kor e ti desy aduk. Ma taktemtem a tamukmuka ity ti desy mingguke enai ne, maktei o nenmo bisa ma msyaluk yaw dakun ma kswaur wasikw laklakutke bai Spanyol.

²⁵ Keskyede senweke kala ma kbwai nus Yerusalemke aduk, ma kety kuban iry matohakare rawahuk ma ana ranal ma rsaluk Hulasokwe wasi irire o nus Yerusalem so.

²⁶ Kali iry matohak mamin ti propinsi Make-doniake ode propinsi Akhayake ne, neke rtanuk maiske de, ma rawahuk kuban, ma ral ma rsaluk ribun matohak lema manait ei sra o hah mamin o nus Yerusalemke.

²⁷ Ode iry nekre rmesan a rohut ma rawahuk kuban. Ode sir desike mlay bain o wait harharke ma musti mo rsaluk iry a Yahudi desikre. Kali iry Yahudi-nare rety Brit Eraske ti iry a lema Yahudi-nare, dendye sir desike ratot eras manosy Hulasokwe, neke kyosy iry a Yahudi-nare, dendye iry a lema Yahudi desikre musti mo rsaluk iry a Yahudi matohak ti Kristuske ne, ti nam matol ti wait mormyorif sew kyaki nekre.

²⁸ Dendye kolnye kala wasikw karya desy ti Yerusalem ne ma ktei, neke kety kuban rawahuk desikre mumu ti iry mamin ti Yerusalem desikre aduk, desikeo nenmo kbwai Spanyol. Ode kyoat a ana kbwai Spanyol, desikeo kswery ei wasimy nuske aduk.

²⁹ Ode ktwohak ohe, kyoat ti ksweak a e, desikeo ana kety a eras ribun manosy Kristuske ti miktemtem.

³⁰ Waikw o hatnimakw e, tety ral sasamke tor ity Ebut Yesus Kristuske, ode Hulasokwe Memeanke kkyarya ti ity ralatare ma it de lyobak it. Kali koldyesike mane kal ralakkwe kralake ma kuten toha e, ma kyaki-kyaki ne myety ral sasamke myor yaw, ma talkyaw ity ma tsambayan ti Hulasokwe ma syaluk yaw ti wasikw karya ne.

³¹ Ode msyambayan ma Hulasokwe ijaga yaw, ma kete iry a lema matohak mamin ti propinsi Yudeake ne rala atyat yaw. Ode msyambayan dakun ma kyoat kety kubanke ma kal ti Hulasokwe wasi irire ti nus Yerusalemke, desikeo iry desikre ana ral kuban desy kyor ralat mamukmuka iare.

³² Dendye kolnye kala karyaakw nekre mumu ma ktei koldyesy, ode kolnye Hulasokwe you, desikeo bisa ma kbwa ti ksweak a e kor ralakkwe krala mamukmuka mamarmara ike. Ode ralakkwe bisa ma kele rteka, kolnye ana kor e ti desy.

³³ Lemadendye kuten ma Hulasow a manal wasi inaka eras ma ity ne yor miktemtem mumu. Amin.

Paulus yosa wasi salamke ti ribun matohak mamin ti nus lan Romake

¹ Waikw o hatnimakw e! Kyosy atyahy ne, kb-wuma kuhes ti e ti khyali ity hatnimat wamfwetke ma ani Febe. I neke eras a i, ode ika diaken ma syaluk ribun matohak a mawahuk sir ma rasambayan ti hnu Kengkreake.

² Ode i neke yety ral sasamke yor ity Ebutke kola e dakun, dendye kolnye bya ti yait e ti desy, desikeo kuten ma mikita ma myal i eras-eras, ma ktyoha ktela Hulasokwe wasi irire musti mo raalake. Ode kolnye byu nam dum toha e, desikeo msyaluk i ma myal ti i, kali i neke dakun o syaluk yaw, ode syaluk irire ribun dakun de.

³ Ode kuten ma mlyosu wasikw salamke ti Priskila yor lai Akwila. Deruke ne Yesus Kristuske wasi makarya sir kola yaw, ma aramy mkyarya ti Kristuske.

⁴ Ode kyalake deruke nenma rmaty khyali yaw. Dendye kuten eraske ti deruke. Ode lema kmwes-san a kuten eraske ti sir bo, de iry ribun a lema Yahudi matohak a mawahuk sir ma rasambayan ti nus kabei ta kabei bony ne, raten eraske ti sir dakun.

⁵ Ode mlyosu wasikw salamke ti iry a matohak ma mawahuk sir ma rasambayan ti Akwila yor Priskila wait sekye krala desy. Ode mlyosu wasikw salamke ti waikw Epenetus kulobak desy. I neke iry mamunmuna matohak ti Kristuske ti propinsi Asiake ne.

⁶ Ode mlyosu wasikw salamke ti Maria dakun, i neke yalkyaw i ma kyarya ma syaluk e.

⁷ Ode mlyosu wasikw salamke ti Andronikus yor Yunias, iry deru neke iry a Yahudi sir kola yaw dakun, ma kyalake sir ne ranor yaw ti sey metmetke kralake ne. Iry deru neke rtohak ti Kristuske a kmuna yaw, ode sir ne Kristuske wasi nyaso sir dakun, ode ribunke ralan sir.

⁸ Ode mlyosu wasikw salamke dakun ti waikw Ampliatus kulobak ne, kali yor yaw ne, aramy myety ral sasamke myor ity Ebutke.

⁹ Ode mlyosu wasikw salamke dakun ti Urbanus, liakw a aramy miktem a mikarya ti Kristuske ne. Ode mlyosu wasikw salamke ti Stakis, waikw a kulobak desy dakun.

¹⁰ Ode mlyosu wasikw salamke ti Apeles, kali syusu ohe tyohak manenen ti Kristuske, biar ma masunkwe kdyan i. Ode mlyosu wasikw salamke ti iry mamin ti Aristobulus wasi sekye krala desy dakun.

¹¹ Ode mlyosu wasikw salamke ti Herodion, ara miru neke iry a Yahudi aramy. Ode mlyosu wasikw salamke ti iry matohak mamin ti Narkisus wasi sekye krala desy dakun.

¹² Ode mlyosu wasikw salamke ti Trifena yor wai Trifosa.* Iry deru desike ralkyaw sir ma rkarya ti ity Ebutke. Ode mlyosu wasikw salamke dakun ti rahyetakw Persis kulobak desy, i desike dakun o yalkyaw i bain-bain ma kyarya ti ity Ebutke.

¹³ Ode mlyosu wasikw salamke dakun ti Rufus, iry a ity Ebutke ilik ma wasi iry a i ne. Ode mlyosu

* **16:12 16:12** *Trifena yor wai Trifosa neke wamfwet sir.* **16:13**
16:13 Mrk. 15:21

wasikw salamke dakun ti Rufus ena, i neke yala yaw kola dene anan elikke ne.

¹⁴ Ode mlyosu wasikw salamke dakun ti Asinkritus, Flegon, Hermes, Patrobas, Hermas, ode ti ity wait o ity hatnimat matohak a manor sir desikre dakun.

¹⁵ Ode mlyosu wasikw salamke dakun ti Filologus yor Yulia, ode ti Nereus yor rahyeta, ode ti Olimpás, ode ti Hulasokwe wasi irire mumu manor sir desikre dakun.

¹⁶ Ode kolnye it de yait it ma miwahuk a e, desikeo it de iten alanke ti it, ma ksyusu wasimy loblobakke. Ode iry matohak ti Kristuske mumu ne ma rawahuk sir ti nus o hnu nekre, neke rosa wait salamke ti e mumu dakun.

Paulus wasi snurat manosy lyakwe

¹⁷ Waikw o hatnimakw e! Kal ralakkwe kralake ma kswurat e. Mnyenas! Mijaga mamak, kali irire dum a rhury a iry matohakare ma rasali sir, ma ra-la toha wait tohtohakare de, kali iry desikre sir ne rajar nam a lema mlaire, ma lema kola nam a mlay miajar ma mihe nekre de. Dendye mijaga mamak a e ma kete kyal nini iry desikre rhury a e koldyesy dakun. Lemade kete mika lui myor iry desikre.

¹⁸ Ktwanuk koldyesy, kali iry maoly desikre, lema rkarya ti ity Ebut Yesus Kristuske. De cuma mo rbuma rtoha wait dakdyakinare kmyesan bo. Ode rtanuk tun a mtelasare ma rulak de rtalik irire, neke iry a lema marekan a khye iry desikre wait kakmetare ma khyury ma lema rtoha sal a mlakye.

¹⁹ Keskyede iry ribunke rtomolu deny ohe, ei neke mkyumak malkyakaw Brit Eras aramy mia-jar ti e ma mihe desy de. Ode khyali desike mane kumukmuka kumarmara yaw. Ode kbwuma ei neke mhye ei lulw o lyaw, ma bisa ma myilik a mhye eraske toha atyatke, mamode ei ne myala ktela erasare, ode soso e toha ktela atyatare.

²⁰ Ode ana lema soso bonyo, Hulasow manal in-aka eraske ma ity ne, iskyui-iskyay haret manosy ngkeskwaure wait uskwe khatuke ne, ma ei ne ana msyaa lwaumy ti uskwe khatu ngkeskwaw desy uno mata. Lemade kuten ma eras manosy ity Ebut Yesuske kyor miktemtem mumu.

²¹ Ode waikw a Timotius makarya manor yaw ne yosa salamke ti e dakun. Ode Lukius, Yason, ode Sosipater, neke iry a Yahudi sir kola yaw dakun, sir neke rosa wait salamke ti e dakun.

²² Ode yaw neke Tertius, ma kkwesy Paulus wasi tuna khatunare ti wasi atyahy ne.[†] Yaw neke dakun o kosa wasikw salamke ti e, kali ity neke tety ral sasamke tor ity Ebutke.

²³ Ode Gayus yosa wasi salamke ti e dakun. Gayus neke i ne inal Paulus yaw ne, ma kumin ti wasi sekye. Ode ribun matohak mawahuk sir ti Gayus wasi sey ne dakun o, rosa wait salamke ti e. Ode Erastus neke iry makumak nus ne wasi kubanke, yosa wasi salamke ti e dakun. Ode ity wait Kwartus neke yosa wasi salamke ti e dakun.
[

16:21 16:21 Kis. 16:1 [†] **16:22 16:22** Kolnye Paulus byuma kyesy wasi atyahy nekre, desikeo ia tyanuk, klala iry salik a rkesy bo. Ti atyahy ne iry makeskye ani Tertius. **16:23 16:23** Kis. 19:29; 1Kor. 1:14; 2Tim. 4:20

²⁴ Kuten ma eras manosy ity Ebut Yesus Kristuske kyor miktemtem mumu. Amin.]

Paulus kys wasi atyahkye

²⁵ Waikw o hatnimakw e, mmya ma tleru Hulasokwe Anike! I neke haretke kimin a I, ma yalkyaw wasimy tohtohakare ma kimbwakar. Ktela desike ne kulosu ti e ne, ti kyoat kuabrita Brit Eras malosus Yesus Kristuske ne. Brit Eras kuabrita neke heitlulswo kihunik i ma irire lema rhe,

²⁶ keskyede senweke Hulasokwe syisy hela ma ity mumu de, ma ktyoha nam Hulasow mamorif manal nini namke iharetake. Heitlulswoke Hulasokwe lyosu ti manety nyanoare ma rkesy Brit Eras desike, ode selsel ne aramy myabrita msyaur Brit desike ti iry ribunke. Aramy myala koldyesy, mamode irire mumu ti nuske ktem ne rhe Brit Eras malosus Kristuske desy, ma bisa ma rtohak ti I, ode rtoha I.

²⁷ Lemadendye mmya ma tleru Hulasokwe Anike! Cuma mo I neke Hulasow a I a myesan bo! Ode I neke myesan a hye sai ta sai bo! Dendye mmya ma tleru Hulasokwe Anike ti kiba knaru ne, khyali nam Yesus Kristuske ialanare. Amin!

Teike desy de.

Maslyarw
Selaru: Maslyarw (New Testament+)

copyright © 2020 Wycliffe Bible Translators, Inc.

Language: Selaru

Contributor: Yayasan Pemberdayaan Masyarakat Desa

All rights reserved.

2025-07-02

PDF generated using Haiola and XeLaTeX on 1 Jul 2025 from source files
dated 2 Jul 2025

aa803409-8241-5c42-9d29-08a9067bdb9f